

三信除疑無情證自在經會解
上

鳳樓文庫
文庫 19
F309
24-2-1
早稲田大学図書印

0 25 30 35 40 45 50

F399
29:21

正信除疑無脩證自在經會解上

明金臺霧靈山 羅大士

著述

金陵華陽居士 王海潮 會解

中嶽少室沙門 海濱 較正

淳溪常住居士 邢振羽

叅閱

灑上常明居士 章渾

正信除疑無脩證自在經

此經一部名曰正信除疑無脩證自在經以警擇為
題乃是智慧朗照發明道體無脩也正信者正中不
偏信實不虛一切行人既欲整心慮趨菩提當生正

風陵書屋藏本
澤田瑞穗

信之心。爲入道之門也。宗鏡云。須求正見。莫信邪師。率嚴云。信爲道原。功德母。長養一切諸善根。除疑者。正信之人。掃除一切疑惑之心。法華云。念念勿生疑也。無脩證者。道體本具。不假脩爲。無有脩因。證果之事。傳燈云。道體本無脩。不脩自合道。自在者。明此一段真風。豎窮三際。橫徧十方。天上天下。隨其所在。無不自由。永嘉云。不見一法節。如來方得名爲觀自在。經者。能詮之文。道非文不載。學者卽文以明道。無脩自在可得矣。此經二十五品。品品有正信。除疑。前後三十五科。科科有無脩自在。如一品二品。勉人正信。三品四品。令人除疑。先天言無脩證。安心言其自在。一經大義。一題攝之。故曰。正信除疑。無脩證自在。經題解竟。偈曰。

正道無邪理不偏

信心誠實境難遷

除疑斷盡心中惑

無證叅明劫外天

自在逍遙無管束

經卷宣揚有妙玄

二十五品甘露味

流通苦海度人船

正是 一日得還鄉 不做飄蓬客

總判此經前後兩節。中二十五品。主意三十五科。古教八十宗。○公案七十二則。復有三分之別。謂前一

節三科。言其序分。中二十五品。三十一科。言其正宗分。後一節一科。言其流通分。計一萬五千三字。

有一等愚癡迷種。說飲酒喫肉。不叅道。也得歸家。

解曰。此經一節。言其序分。內含主意三科。一者。愚癡不信。祖見世人。妄說飲酒喫肉。不叅道。也得歸家。故立此經示之。有一等者。不指其名。愚癡迷種。愚而無智。癡而無慧。此等迷種。妄言飲酒喫肉。不叅大道。也得歸家。

迷人終日走着生死之路。又不知安身立命。又不知淨土家鄉。他怎麼得歸家。

此辯迷人不得歸家也。生死之路者。不受歸戒之人。每日塵勞汨汨。無非種地獄之深根。終朝業識茫茫。盡是失人身之捷徑。不知安身立命。淨土家鄉者。迷人不叅妙道。只知愛養色身。不知淨土法身。背覺合塵。故云。他怎麼得歸家。

無極聖祖見他不叅道。臨命終時。着他下無間地獄。永轉輪迴。四生受苦。不得翻身。

此點迷人難免惡道之苦也。無極聖祖十方神聖之總稱。地府閻君之別號。叅者。尋究也。道猶路也。卽是淨土家鄉也。地獄者。世人爲惡。則墮地獄。無間者。恒

苦無盡。迷人不參大道。死墮無間地獄。地獄罪畢。又轉四生。不能得轉人身也。又引

科儀云。一失人身萬劫難。難時永不得翻身。

此引證上不得翻身也。上句引教證宗。下句以宗判教。正是佛法難逢龜值木。人身罕遇芥投針。

龐居士云。天人生滅福來去如車輪。

此出居士詩上。龐公言天人有生滅之福。此引證上。迷人豈得歸家。而無輪迴也。故曰來去如車輪。

大涅槃經二十八卷云。迷人不知虛空諸佛境界。永轉輪迴受苦無盡。永在苦海。

此引師子吼品第十一。迷人四句。宗旨起下。教義不知虛空諸佛境界。經云。欲知諸佛之境界。當淨其意。如虛空。佛真法身。猶若虛空。衆生心垢。非佛境界。故曰不知。後三句。直言衆生境界也。

一切衆生不見佛性。常爲煩惱繫縛。流轉生死。永劫不得翻身。

衆生不見佛性。卽是飲酒食肉。不參大道。迷人三途有分。難復人身。故曰永劫不得翻身。上言虛空諸佛境界。卽是安身立命。淨土家鄉。智人一信無疑。卽入諸佛境界。愚人多聞多退。常爲煩惱繫縛。

科儀云。正信希有。

此言正信之士。悟入諸佛境界。世間希罕。少有也。大顛註解云。上等之人。信無疑。中下之人。不信心。生怪說。此難信之法。希有之事。

此引大顛。美智警愚。上等之人。一聞諸佛境界。卽得安身立命。信解受持。不生疑惑。中等之人。信而不解。下等之人。信解全無。心生疑怪。說此難信之法。希有之事也。

彌陀卷云。能度一切人歸家。不能度不信之人。

此引深度。不信之人。元珪禪師云。佛能空一切相。不

能滅定業。佛能知衆生有佛性。不能化導無緣。佛能度無量有情。不能度盡衆生界。佛爲三界大師。尚有三不能。故曰。不能度不信之人。不信之人。卽是衆生境界。折疑論云。貂皮雖暖。難溫無氣之人。佛法雖靈。難勸不信之士。

科儀云。直下承當。莫待今生錯過。今生錯過。後世難逢。此出序分。後二句。以宗釋教。直下承當者。一聞千悟。更不生疑也。圓覺序云。衆生之所以往來者。六道也。鬼神沉幽愁之苦。鳥獸懷猶狘之悲。脩羅方曠。諸天正樂。可以整心慮。趨善提。惟人道爲能耳。人而不爲。

吾末如之何也已矣。上言愚癡不信一科。竟○下言財法兩施二科也。

師傳說與四衆人。又要你齋僧齋俗。惜孤念寡。愛老憐貧。慈悲飲食。慈悲施法。休要毒心。

此言財法兩施。勉人廣行六度。發起四無量心。師傳祖自謂也。四衆。破邪三品。解明。我祖付囑四衆人等。當行四無量心。六波羅蜜。齋僧。施其僧尼。齋俗。濟其饑民。惜孤。矜其幼而無父。念寡。憫其老而無夫。愛老。親其衰老。憐貧。惠其困乏。施食。施法。先施其財。後施其法。有法無財。不能弘揚佛道。有財無法。不能普化衆生。施法者。量地下種。施財者。稱家有無。勉人福慧圓脩。不可偏廢。故云。休要毒心。前文已竟。偈曰。

又齋僧又齋俗。慈悲施法。又惜孤又念寡。可憐貧人。此偈至下。重頌上文。此二句。勉人財法二施。卽得福

慧兩足。正子瞻所謂爲鼠常留飯。憐蛾不點燈。

四衆人原是佛。沉淪苦海。發慈悲救度他。早得超昇。四衆人原是佛。中峯云。六道衆生。本來是佛。只因迷妄。不肯信佛。故曰。沉淪苦海。我祖加勉四衆。不可缺了慈悲。故曰。發慈悲救度他。早得超昇。

發慈悲救度他。出離苦海。超生死。躲輪迴。早得超昇。

學人叅道先發四無量心。慈同諸佛。悲合衆生。普度一切有情。齊超生死苦海。此上六句。言正信之人。財法兩施了無脩證。得大自在。若不除疑。焉能及此也。不齋僧不齋俗。無有慈悲。心狠毒無慈悲。怎敢度人。此合下六句。言無慈悲之人。心卽狠毒。慳貪不施。佛法不能興隆。將何普度衆生。萬獸集云。狼蜃獸者。四足二翅。獨角有鱗。唇生四鬚。遇風食虎。逢雲吞龍。飛空噉鳥。入海餐魚。學人心無慈善。喻如狼蜃不異也。忽然間不得地乞食討飯。到人家不與你痛淚心酸。倘若從前富貴。末後貧窮。衣不遮身。食不充口。此等之人。皆是前生不施。今生受之。

都似你這樣人。世間難過。輕諸佛不齋他。怎做好人。此言不施之人。只圖自己飽暖。不惜他人饑寒。故曰世間難過。經云。蠢動含靈。皆有佛性。若不愍念衆生。卽同輕慢諸佛。故曰怎做好人。上頌施與不施。竟下復舉古勸今也。

想漢王不得地乞食討飯

世間乞丐。非是天生內隱好人。不可輕視。舉西漢高祖。姓劉。名邦。字季。在始皇時。爲泗上亭長。解囚犯往豐邑。途中謂囚曰。當今無道。吾放汝等各去。吾亦從

此逝矣。囚有壯丁者十餘人，相從同往。夜半至大澤中，有大蛇當道，人皆畏之，不往。季曰：「此處不捨性命，何處求取功名？」遂拔劍向前，斬蛇而過。後來者告季曰：「前死蛇處，有老婦哭曰：『吾兒白帝子，今被赤帝子斬。』」因此結下冤仇。後至東漢光武劉秀，字文叔，遇王莽篡位，秀起兵討之，行至蕪蕪亭，乏食，馮異將豆粥奉之。其後又被莽將王郎兵追至滹沱河，遇大風雨，濕衣乏食，走入民舍，鄧禹檢薪燒火，與秀烘衣。馮異民家覓飯奉秀充饑，秀曰：「幸見天日，無相忘也。」其後秀得天下，遣詔旌表馮異，詔曰：「久懷豆粥麥飯之餽，厚意久未報也。祖舉漢王乏食，引古勸今，貧富興衰，誰能長保。」

馬潛龍不得地，叫化爲生。

潛龍傳云：馬晉王太子，名潛龍。國老王敦篡位，逼龍東海乞丐，後得兵糧，復興晉業。

伍子胥在丹陽，品簫乞化，受貧窮不得地，都是一般子。胥傳云：子胥，姓伍，名員，初在楚，平王聽信讒言，殺其父伍奢。子胥遂逃難丹陽，品簫乞食。卒相吳王，伐楚，掘平王屍鞭之。這等蓋世英雄，也有一時落薄。今人運退身貧，都是一般模樣。

見了他幾家貧貧了又富。見了他幾家富富了還貧。貧富貴二箇字誰人長保。無慈悲失了脚不如別人。頌曰。貧了又富富還貧。貧富循環認不真。富貴誰能常保守。得施恩處且施恩。

上等人信得急歸家去了。下等人不信心永墮沉淪。上等人信得急天堂大路。下等人不信心永不翻身。此結財法兩施。信與不信罪福也。天堂地獄諸佛衆生皆在此一點心耳。古德云。三點如星象。橫鈎似月斜。皮毛從此得。作佛也由他。上言財法兩施二科。竟○下言君臣恩德三科也。

倚托

皇王水土。五穀稻糧。護國功臣。文武大臣。護法。以此我。得安穩。叅道。總報恩情。

此序君恩臣德。苦序解明。偈曰。

倚托我王江山穩

二托功臣護持恩

不是皇王文武護

誰敢發心轉法輪

倚托我王洪福大

二托文武護法恩

普度諸人歸家去

報答護法出苦輪

此偈至下。重頌上文。解破邪序分。

取經不是聖者護

誰敢西天去取經

取得經來度衆生

護法功德永無窮

不是唐王牒文去

誰敢西天去取經

經卷不是龍牌護

誰敢發心轉法輪

唐僧護法成佛去

今是古來古是今

國王大臣護佛法

成佛功德永無窮

此顯護法利益。上言序分經旨。前一節三科已竟。偈

晉宋齊梁唐代間

高僧求法離長安

去人成百歸無十

後輩應知前者難

雪嶺崎嶇侵骨冷

流沙波浪徹心寒

後賢若不諳斯旨

往往將經容易看

諸惡趣受苦熬大劫無量品第一

此經一品。主意一科。劫量長遠也。祖見世人不知四生遷轉。六道漂沉。故立此經示之。諸惡趣受苦。總舉地獄餓鬼畜生。三惡道受苦也。熬大劫無量。總指草木芥子等劫。遭此劫中。受苦非一。無有數目限量也。品者。義趣相從。文成一段。第者。前後有條。次第不紊。此經二十五品。以此為始。品題解竟。偈曰

一自當初別本家

隨情流浪遍天涯

七情擾攘猶為樂

八苦交煎更不嗟

萬劫淚痕如驟雨

千生身竅似恒沙

生前不受瞿曇戒

死後輪迴數似麻

大藏覽集劫量品婆沙論云有一苾芻白佛劫爲何量佛言劫量長遠非百千等歲數可知

此出六卷題言劫量長遠故引論以證之苾芻者比丘之別名也金剛經云與大比丘衆藥師經云與大苾芻衆唐梵品苾芻香草具五德一者體性柔軟喻行人折伏身心二者引蔓徬布喻傳法不絕三者馨香遠聞喻戒行芳馥四者能療疼痛喻能斷煩惱五者不避日光喻常向佛日行人具此五德故曰苾芻問佛劫數有何限量佛言劫量長遠非百千歲數

苾芻復言有譬喻不佛答言有

苾芻復問譬喻佛乃以喻答之譬喻者托言訓曉以淺明深也

草木劫三千大千世界草木作籌人間百年除一寸除盡大千世界草木爲一大劫

法數偈曰大千草木寸爲籌盡大千世界草木皆寸斲爲籌乃佛以大譬喻論劫量也劫者半梵語全云劫波此翻時分我祖按偈成文下三倣此

芥子劫滿城芥子一面一百里四面四百里人間百年除一粒除盡滿城芥子爲一大劫

偈曰。芥子縱橫堆百里。其城四方各一百里。滿堆芥子也。草木芥子。非喻而喻。申明劫量長遠。非百千等歲數可知。此下中小二劫。有數可推。又不同此論矣。斛麻劫。一萬二百四十斛麻子。人間百年除一粒。除盡斛麻數。爲一中劫。

偈曰。婆訶油麻中可見。佛以中譬喻論劫量也。智度論云。須彌之外。第九鐵圍山下。有十次地獄。前五寒水。後五熱焰。各經斛麻數苦。數盡方出地獄。前壽轉短於後。後苦倍勝於前。謂一獄二十斛。二獄四十斛。三獄八十斛。四獄一百六十斛。五獄三百二十斛。六獄六百四十斛。七獄一千二百八十斛。八獄二千五百六十斛。九獄五千一百二十斛。十獄一萬零二百四十斛。人間百年除麻一粒。麻盡出獄。是名中劫。智度論云。梵語一婆訶。此云二十斛。一斛卽五斗也。偈曰。大小兩座鐵圍山。日月星辰不照處。中有十大寒熱獄。各各壽算婆訶麻。第一地獄二十斛。後九麻數倍倍加。前五地獄是寒水。後五地獄是熱焰。人間百年除一粒。候茲麻盡出泥犁。所攝中品惡衆生。各各眷屬有十億。

一增一減。轆轤劫爲一小劫。

偈曰。三災四相小堪知。佛以小譬喻論劫量也。三災者。八十轆轤。共計一十三萬四千四百萬年。爲一大三災起也。四相者。二十轆轤成相。共計三萬三千六百萬年。小堪知。一轆轤增減之數。共計一千六百八十萬年。是小中之小。故曰。爲一小劫。破邪二十四。造業之人。墮在地獄惡趣。受苦經此劫數。無量百千。在於惡趣。

此出婆沙論。宗教互用。造業之人。死入地獄受苦。經此草木等劫。有無量百千之數也。

及人天中。生死輪轉。受諸雜苦。何得安然。不求解脫。

此言非但惡趣有苦。縱生天上人間。亦有五衰八苦。經云。三界無安。猶如火宅。衆生何不早求解脫也。

一失人身萬劫難。難時永不得翻身。

此言劫量長遠。永不翻身者。猶如落花飄蕩隨風易。再上枝頭結果難。前文已竟。偈曰。

一萬斛零二百斛麻子數。一百年除一粒除的空了。

除盡了斛麻數。纔出地獄。出地獄又送在六道轉生。

此偈重頌上文。言劫長遠。勉人求脫也。文中四劫。單頌斛麻者。舉一可知其三。先頌地獄。令人生信也。古德云。芥城除盡麻無粒。獄卒牛頭始放行。此言地獄。

罪畢。方轉畜生。

四生裏受苦惱無量無數。熬大劫無量數。纔得出身。纔出身爲人時。又自造業。這一遭失了脚。永不翻身。此頌畜生道中。受盡草木二劫。纔得出世爲人。現在爲人造業。未來又轉四生。三世遷流。受苦無盡。

四生裏受苦惱無量無數。諸惡趣熬大劫。轉到如今。諸惡趣熬大劫。無量無數。這一遭失了脚。永不翻身。此頌品題。諸惡趣受苦。熬大劫無量。有智之人。聞此妙法。早求明師指示。卽時正信除疑。六根門下。放大光明。十二時中。離諸魔障。轆轤草木。頃刻銷鎔。芥子斛麻。一時除盡。隨緣消舊業。更不造新殃。正是當人要脫輪迴苦。只看今生這一遭。上言諸惡趣受苦。熬大劫無量。經旨一品已畢。偈曰。

四劫循環六道中。

皆因未得念頭空。

斛麻芥子何年盡。

轆轤草木幾時窮。

死死生生吞熱鐵。

來來去去灌鎔銅。

上人早奮冲天志。

不墮三途地獄中。

嘆人生不常遠。品第二。

此經一品。內含主意二科。一者愚癡退道也。祖見世人。不思過去未來受苦。只知現在享福作樂。故立此

經示之。嘆者。嗟嘆。人生不常遠者。住世暫時不久。三人同百。七十者稀。迷人不知最初原無此身。只因妄心不了。轉識投胎。三緣和合。方有此身。生時朱顏綠鬢。老來鶴髮雞皮。病則風寒暑濕。死則氣絕神移。這箇生老病死。何人免得。古德云。昨日街頭猶走馬。今朝棺內已眠屍。迷人只知生。不知死。只知血肉色身。不知清淨法身。一日無常。富貴榮華。猶如春夢。真可嗟嘆哉。品題解竟。偈曰。

人身不久世無常。

花酒牢籠沒主張。

百歲利名如曉露。

一生富貴似朝霜。

生前不念千聲佛。

死後難逃十箇王。

縱有萬金將不去。

罪無人替自家當。

愚癡之人。不想無量曠大劫來。轉四生六道。諸惡趣中。受苦無量。又不想死後。打在諸惡趣中。受苦無盡。

此點愚人。只知現在受樂。不思過去未來受苦。愚癡者。無有智慧之人。不肯思前想後。無量曠大劫。卽前草木芥子也。四生六道。破邪十六解明。諸惡趣中。受苦無量。卽前品題。諸惡趣受苦。熬大劫無量也。今得人身。又不回頭。一失人身。萬劫難。故曰。受苦無盡。愚癡之人。不知是箇血肉膿身。死後變做塵土。不知死。

後變做啞牙死屍臭爛不堪。

血肉膿身臭爛不堪者。法數云。人身有七不淨。觀一種子不淨。觀此姪慾身。從貪愛煩惱生。二受生不淨。父母赤白二滴。和合托識其中。三住處不淨。處母胎生臟之下。熟臟之上。四食噉不淨。胎中唯食母血。五初生不淨。產時與血俱出。六舉體不淨。薄皮之內。膿血徧一切處。七究竟不淨。死後胖脹臭爛。厭身文云。幻影漚花。一箇身壞來總是一堆塵。此兒血氣成團。聚多少愚人。總認真我祖說破血肉膿身。勉人洞明清淨法身也。

愚癡之人不知是箇膿血之身。名利障了道。

此合下五種障道之人。總言愚癡退道有苦也。愚癡之人不知四大假合。終日貪名圖利。障了先天大道。有智之人靜處默想。彼死屍不淨。我此身亦然。則貪圖名利之心自然息滅矣。

愚癡之人清堂瓦舍富貴榮華障了道。

無智之人受好因緣不能修道。有智之人縱有清堂瓦舍富貴榮華。知因識果。福中修福。功上加功。以爲來生種子也。

愚癡之人受貧人惡是非障了道。

無智之人。受惡因緣。不能修道。有智之人。身雖受貧。心常慕道。永嘉云。窮釋子。口稱貧。實是身貧道不貧。貧則身常披縷褐。道則心藏無價珍。雖在是非場中。觀如龜毛兔角。永嘉云。從他謗。任他非。把火燒天徒自疲。我聞一似飲甘露。銷鎔頓入不思議。觀惡言。是功德。此卽成吾善知識。不因訕謗起冤親。何表無生慈忍力。

愚癡之人。詭詐障了道。

詭詐者。老奸巨滑。機巧哄人。滅他人之道德。誇自己之才能。古德云。心田長蔓草。無明日日生。若要成道日。直待甕生根。

爲官名利障了道。

爲官者。三公之位。萬鍾之祿。惟享今生之福。不修來世之因。正是名利障了先天大道也。有智之人。自不至以官障道。白侍郎云。刀筆隨身四十年。是是非非有萬千。一家飽暖千家怨。半世功名百世冤。紫袍金帶無心戀。麻衣拄杖自天然。有人問我西來意。水在長江月在天。

永受諸苦。不得翻身。

此結上五種障道之人。身後有苦無樂也。

有智之人好也不能障道。歹也不能障道。人惡是非不能障道。好也進道。惡也進道。人惡是非不退道。永超凡世再不來。無量壽限永快樂。

此美有智之人。一心修道。不以好惡而生進退身後。有樂無苦也。

有智之人得了道。怎麼說。無智之人得了道。怎麼說。

此辯智愚得道有何差別。得道者是初發信心修道。上等有智之人。想無量劫生死受苦無盡。又怕死後不得翻身。永不開葷酒。

此言有智發心修道之堅。上等之人。不教而善。一初

發心。念如金剛。深思前後苦趣。永不破戒。說得行得。

有誠實。無虛假。實爲生死。不圖名利。又豈肯開葷

下等無智之人。得了道。不想無量劫生死受苦無盡。又怕死後。永不得翻身。開了葷酒。叫做下等之人。

此言無智發心修道之不堅。下等之人。教亦不善。雖有信心。念如浮萍。不想前後無量之苦。惟圖現在一時之樂。說得行不得。有虛假。無誠實。跟着惡友。開了葷酒。故叫做下等之人。

你不怕生死。開了葷酒。說師傅着你開了齋。我要着你開了齋。我當時身化做膿血。你要開了葷酒。邪了人天。

永墮沉淪。不得翻身。

無智之人。不怕生死開齋。自不知過。加罪於師。我祖以身發誓。令人正信除疑。無智小人。自害害人。故我祖罰云。永墮沉淪。不得翻身。且道。酒是米造。何故永墮沉淪。優曇云。酒是迷魂。懵懂湯。惺惺喫了也。顛狂可憐。口念彌陀者。含血來噴大法王。恐人不信。引教爲憑。

目連卷云。聽說開齋偈。你要開齋戒。擋住衆人天。死後爲餓鬼。永劫不翻身。

此引證明開齋之人。難免餓鬼之報。前文已竟。又引

彌陀卷云。

上品諸佛盡同行。

中品疑惑有怪心。

下品遲疑多進退。

休怨彌陀願不平。

此引頌明愚癡退道也。上等之人。一聞千悟。與佛齊肩。中下之人。多聽多疑。進退不一。彌陀願力是平。行人智愚不一。依因證果。故曰。休怨彌陀願不平。老子曰。上士聞道。勤而行之。中士聞道。若存若亡。下士聞道。大笑之。又疑惑有三。一疑自不能入理。二疑師不能善化。三疑法不能出苦。喻有病者。疑自命短。疑醫不明。疑藥不效。行人疑病不除。縱有妙法。莫能度矣。

目連卷云

良言普勸衆人聽

莫作開齋破戒人

死墮陰司爲餓鬼

那時受苦自甘辛

頭似泰山十分重

腹如滄海喉似針

永劫不能聞漿水

舉步常作破車聲

本卷云尊者遊獄救母見一餓鬼地獄頭似泰山腹如滄海喉似針尖舉步之時常作破車之聲尊者問曰汝等生前作何罪業今受斯苦餓鬼答曰我等在生破人齋戒不信三寶慳貪不施故獲此報尊者說此八句祖引勸勉後學不可退道開齋招此苦報也

與人開齋爲餓鬼

自家開齋重十分

擋住人天都受苦

你下地獄不翻身

此四句總結上偈與人開齋罪小自己開齋罪大阿含云昔有大商禮楊浦師歸佛受戒其子益耳勸父開齋父終不從子後海中取寶風吹失伴一十八年忽然渴急遙望一城火光燎繞疑有水而覓之至城叫水驚動城中餓鬼探城問曰何方賢聖與我等水益耳答曰我來覓水解渴衆鬼嘆曰我等開齋報墮斯城百千萬劫未聞水名何得水來與汝解渴益耳聽之驚悔前過卽時皈依三寶其城忽然頓空今人

一念信心。三惡自然消滅。上言愚癡退道一科竟。○
下言人身不久二科也。

我嘆無常好恓惶

搭手心頭細思量

四大幻身不堅久

師徒相逢夢一場

此偈至下。正頌品題。嘆人生不常遠也。無常者。人命
無常。如風中燭。我祖靜中自嘆。四大幻身。地水火風
合成。豈能堅久。不變。想我無涯師傅。正好興揚佛事。
不覺一朝風火散。他向東來。我向西。故曰。師徒相逢
夢一場。

我嘆無常好恓惶

搭手心頭細思量

四大幻身不堅久

父子相逢夢一場

我嘆無常好恓惶

搭手心頭細思量

四大幻身不堅久

娘兒相逢夢一場

祖想三歲無母。七歲無父。雙親一別。再不相逢。猶如
南柯一夢。教人怎不恓惶。小涅槃經云。母子恩情。也
有離別。古德云。父子團圓樂。歡娛有幾春。一朝風火
散。夢裏見雙親。

我嘆無常好恓惶

搭手心頭細思量

七尺骷髏不堅久

英雄好漢夢一場

人生於世。生必有死。縱然英雄蓋世。誰人免得無常。

昔日霸王勢盡烏江。韓信時衰喪未央。總不如子房棄職歸山好。遺得芳名滿世間。寒山云。蓋世英雄客。黃梁夢一場。不如癡呆漢。極樂是安養。骷髏者。此身不但死後是骷髏。現在大病臨身。三朝五日。點水不飲。粒米不餐。渾身骨露。遍體金粧。行倚拄杖。起要人扶。昔日英雄都不見。猶如活鬼出棺材。豈不是現在骷髏也。上嘆有情。正報是夢。以明人生不常遠。下嘆無情。依報是夢。復申障道之因緣。

我嘆無常好恓惶

各自回頭細思量

一包膿血不堅久

功名蓋世夢一場

宗鏡云。功名蓋世。無非大夢一場。昔呂翁經邯鄲。盧生同邸。主人方蒸黃梁。盧具言。生世困厄。翁取囊中枕以授之。曰。枕此當榮適如願。生恍記身入枕穴中。未幾登第。出將入相五十年。榮顯無比。忽欠伸而醒。呂翁在傍。黃梁尚未熟。正是人間富貴花間露。紙上功名水上漚。

我嘆無常好恓惶

搭手心頭細思量

一包膿血不堅久

榮華富貴夢一場

富者良田萬頃。大厦千間。貴者位至三公。祿享千鍾。誰想命盡無常。拋下一家骨肉。縱有父母妻兒。也替

不得榮華富貴也帶不得淨土詩云皮包血肉骨纏筋顛倒凡夫認作身到此始知非是我從前金玉付他人。

我嘆無常好恓惶

搭手心頭細思量

一包膿血不堅久

畫梁斗拱夢一場

此嘆人間高樓大廈粉壁朱門雖然目前華麗總是南柯一夢漢書云畫梁斗拱猶未乾堂前不見痴心客三寸氣在千般用一日無常萬事休。

我嘆無常好恓惶

搭手心頭細思量

一包膿血不堅久

清堂瓦舍夢一場

前言畫梁斗拱此言清堂瓦室乃一貧一富見得是沒帳故曰清堂瓦舍夢一場。

心經卷云

家有黃金着斗量

有錢難買不無常

饒你蓋下千間舍

一身難臥兩張床

此結富貴之人黃金過北斗無常也是空古云大廈千間夜眠八尺故曰一身難臥兩張床上言嘆人生不常遠經旨一品二科竟偈曰

生死從來古有之

誰人壽滿百年期

千間大厦空身去

萬頃良田赤手回

富貴臨終成夢幻

功名到底化爲灰

若不淨心持大戒

閻王豈怕掛金魚

往生淨土品第三

此經一品主意一科舉古勸今也。祖見行人不能正信，多逐偏疑，故立此經示之。往生淨土者，淨土有二：有真淨土，有莊嚴淨土。菩薩行六度萬行，齋僧布施，修寺建塔，印經造像，廣種福田，這是佛事門頭，不捨一法。莊嚴淨土是也。世尊觀三界唯心，萬法唯識，十方國土，普現全身，諸佛衆生等無差別，這是實際理地，不受一塵，此乃真淨土也。維摩經云：若菩薩欲得淨土，當淨其心，隨其心淨，則佛土淨。此品公案一十一則，皆是舉古勸今，令人正信除疑。宗鏡云：莊嚴生淨土，金粟眼中沙，初生全泄漏，末後又拈花。品題解竟偈曰：

惟心淨土絕商量

二六時中普放光

刻刻常逢觀自在

時時親見法中王

青青翠竹真如體

鬱鬱黃花佛道場

識得自己無量壽

塵塵刹刹是西方

龍舒淨土文云：靜文妻得病二年，自求往生淨土，見家鄉境，勸公婆丈夫西方相見，言罷見蓮花大如日輪，歸

家去了。

此文十三卷。宋國學進士王日休撰。龍舒地名。淨土文。書名。龍舒勸人念佛。往生極樂之文也。本序云。若諸衆生。念彼如來。卽此一念。與佛無異。極樂國土。悉皆現前。全心是佛。全佛是心。心佛無二。更莫遠求。此品十一則公案。舉古勸今。令人正信除疑。發明無修自在。本教云。唐并州溫靜文妻董氏。得病二年。靜文訪求明醫。用烏骨白雞爲引。買雞回家。其妻不從。乃曰。寧可持戒而死。決不破戒而生。我身現病。乃是夙歿。何故殺他命。而救我命。一心念佛。遂見淨土勝境。乃告夫曰。我見佛了。不久定回。願父母丈夫亦同念佛。西方相見。言訖而終。見蓮花大如日輪者。卽是心花開放。親見自性彌陀。正是臨終西方境。分明在目前。故曰歸家去了。我祖引在品前。正讚病女持齋。到有丈夫之志。今時女子修行。也要依他樣子。勸得一家眷屬回心。就與古人無有二樣。頌曰。女子知宿命。有身還有病。疼痛念彌陀。晝夜心清淨。呀。心花發朗。勸公婆。自性西方真個近。

張善和殺牛一生。臨命終。見牛頭追命。怕地獄。告妻兒作急救我。妻聽說。長街請一明師到家。師傅說。往生淨

土十聲佛未了。帶業往生歸家。

本教云。唐張善和。殺牛爲業。臨終見牛數頭。作人言曰。汝殺我善和大恐。妻何氏。一生持齋念佛。勸夫改行不從。善和至此。乃告其妻。作急救我。妻責夫曰。汝乃臨終思妙藥。急難想親人。善和再三哀告。妻至長街。請師到家。善和哀告師傅。我造殺業無數。如何救得。師曰。十六觀經有說。若人臨終。地獄相現。志心十稱南無阿彌陀佛。卽得往生淨土。善和云。便入地獄也。速焚香來。面西端坐。一心念佛。十聲未滿。謂師曰。有佛西來。與我寶座。而終帶業往生者。雖有惡業。悉皆消滅。永嘉云。一切業障本來空。又承善業之力。俱得往生歸家。引此與殺生人除疑。但肯一念念佛。地獄卽時頓空。頌曰。昔有殺牛人。臨終牛討命。一念十聲佛。冤魂都散盡。修行不在幾多年。直下承當凡卽聖。

張鍾馗殺雞一生。臨命終。見羣雞啄破眼。血流盈床。怕地獄一念回心。帶業往生歸家。

本教云。張鍾馗殺雞爲業。臨命終時。忽見一人驅羣雞來。叫云啄啄。四邊來啄。兩眼血流。遍身滿床。受大痛苦。適值一僧。令馗焚香念佛。鍾馗一時惺悟。全心

是佛衆罪如霜。忽聞異香滿室。安然而終。永嘉云。維摩居士頓除疑。猶如赫日消霜雪。古德云。殺雞如切菜。惹下冤業債。渾身都啄破。疼痛無可奈。眼中流鮮血。妻子難替代。呀回光返照頓除疑。帶業往生真箇快。

金大公殺魚一生。回心一日。往生淨土歸家。

本教云。宋徽宗政和六年。會稽金大公。名奭。網魚爲業。宿有善因。一日街坊賣魚。偶遇神僧化度。僧曰。此筐魚有多少數目。公曰。魚缺碎小。不知其數。僧曰。賣銀幾兩。公曰。不上兩數。米度日。僧曰。換米幾石。公

曰。不上石數。僧曰。賣到家中。用度幾年。公曰。一日度一日。神僧嘆曰。一筐碎魚缺。唯求一宿糧。養家千百口。罪坐一身當。三途何日盡。四道幾時忘。大公聽說。膽戰心驚。卽時回心向善。發願曰。甘心餓死。早還鄉。撒手歸家。消業障。隨將魚網罄焚。晝夜念佛萬聲。定課不息。後無疾。告家人曰。我見佛也。焚香來。安然而化。此上四則。出淨土文五卷。

波羅國殺羊人。日殺千羊。回心一晝夜。信得急。往生歸家。

覽集法身品。涅槃經云。波羅奈國中。有一屠兒。姓廣

名額每日殺羊約有千數。一日發心徑往見佛。放下屠刀。便言。我是千佛數內第一尊。佛言。得何旨意。屠兒卽作宰羊勢。口作羊聲。世尊曰。如是如是。汝於賢劫中成佛。屠兒頌曰。如來大慈悲。令我心開悟。白刃生蓮花。千佛中一數。佛讚頌曰。昨日能刀。今日佛。今朝能佛。佛能刀。能刀能佛。無差別。便見眉間白玉毫。諸大菩薩及阿羅漢。疑曰。我等成佛於遠劫。廣額何故成佛在先。佛言。欲早成者卽早。欲遠成者卽遠。若頓見性。卽一念成。故知利鈍不同。遲速在我。此引教之人。信心卽得歸家。今人一念信心。卽與古人二神亮殺生害命。一生作業。死到地獄。受苦重罪。無極化。一老僧教神亮念華嚴經偈。若人欲了知。三世一切佛。應觀法界性。一切唯心造。念了數十遍。無數鬼魂都得超昇淨土。

華嚴感應傳云。昔京師郭神亮。死去七日。復還云。使者追至平等王所。問罪福已。送入地獄。見一僧云。我今救汝地獄之苦。教誦一偈。若人欲了知。三世一切佛。應觀法界性。一切唯心造。神亮志心。乃誦此偈。數遍。獄中同受罪者。數十萬人。皆離地獄。當知此偈能破地獄。塵律師嘆曰。纔聞一偈。脫千萬人苦。況受持

全部講通深義耶。華嚴本經偈出十九卷。夜摩偈讚品第二十。此品有十林菩薩偈讚。此即第九覺林菩薩偈。末後四句是也。若人四句。諸人要知三世諸佛。從何而得。當觀九法界內。一切衆生。唯心所造。九者。既爾。佛亦如是。故知心惡即地獄。心善即天堂。地獄化天堂。其易如反掌。故曰。無數鬼魂。都得超昇淨土。這些殺生人。回頭信心。歸家去了。喫齋人。不信心。永墮沉淪。不信佛語難出世。毀謗正法永沉淪。不信就是毀謗。

此殺生人。總指善和等五人。事雖不同。信心歸家不二。吃齋人不信心者。口齋心不齋。有名而無實。葷酒不斷。養殺不除。雖是喫齋。又不拈香發願。三年五載。只見進少退多。故曰。不信佛語難出世。毀謗正法永沉淪。此毀謗者。非比造惡衆生。行人不能深信。即同毀謗也。偈曰。

靜文妻得重病二年光景 身疼痛念彌陀要求往生
 臭皮囊有病患疼痛難忍 願如今脫離了早得超昇
 發願心二年整大限來到 見西方勝境界現在其中
 勸父母及丈夫願生淨土 到西方佛國土好處安身
 言說罷一念心歸家去了 見西方蓮花朵大如車輪

病女子一念心得生淨土 况今生不信佛永墮沉淪
此偈至下。重頌前文舉古勸今。令人正信除疑也。西
方勝境卽家鄉境也。蓮花大如車輪。卽前大如日輪。
文異理同。後一句。深警持齋男子。若不信心。不如病
女。得生淨土也。上頌靜文妻竟。下乃次第頌之。

殺牛人張善和一生造業 臨命終見牛頭索命追魂
怕地獄告妻兒作急救我 妻聽言請明師來到家中

師傅說念彌陀求生淨土 十聲佛未念了得證金身
殺牛人一念心歸家去了 喫齋人不信佛還墮沉淪

殺雞人張鍾馗一生造業 臨命終見羣雞索命追魂
見羣雞啄破眼血流遍體 張鍾馗怕地獄一念回心

殺雞人一念心歸家去了 喫齋人不信佛還墮沉淪
殺魚人金大公一生造業 忽一日急回心得證金身

打魚人一念心歸家去了 喫齋人不信佛還墮沉淪
此頌殺生之人。臨終一念信心。都得歸家去了。行人

若不信心。難免輪迴之苦。故曰還墮沉淪。
大涅槃經有說

波羅國有屠兒殺羊無數 一日中殺千羊也要回心
急回心一晝夜卽成正覺 如來佛親弟子菩薩之身

殺羊人一念心得成佛道 喫齋人不信佛還墮沉淪

覽集持誦品。華嚴感應傳云。

往昔時有神亮死入地獄。閻王問送地獄受罪不輕。地獄中見一僧教念一偈。教神亮忙持念。即便超昇。急忙念數十遍。華嚴經偈。數十萬靈魂鬼都得超生。受苦鬼一念心脫離苦海。況今生不信佛。永墮沉淪。涅槃覽集文中未出。頌內故復申之。且道神亮死入地獄。有僧教他念偈。色身既是敗壞。又有何人念偈。須知四大雖散。陰靈不空。昔楚霸王自刎烏江。爲神作耗。興風起浪。受人祭獻。後有一秀士題曰。君不君。今臣不臣。緣何立廟在江心。平分天下還嫌少。一百黃錢值幾文。自從題破。再不作耗。秀士一語神也。聽古佛華嚴鬼不聽。蒙山施食曰。猛火焰焰照鐵城。鐵城裏面熱孤魂。孤魂若要生淨土。聽誦華嚴半偈經。有一人誦華嚴淨水洗手。有蟻子聞水滴亦得生天。蟻子蟲聞法水超生天界。況今生不信佛。永墮沉淪。持誦品西域傳云。昔有一人轉華嚴經。以洗手水滴一蟻子。命終生天。若人持經通義。再能饒益衆生。功德豈可量哉。頌曰。西域傳中有一人。持經盥手意虔誠。華嚴功德多殊勝。一滴能超蟻子身。此引加勉後學。爲人不信佛法。怎比蟻子蟲類也。

慈心功德錄有說

南海岸有五百蝙蝠蟲類

聽法音得証了菩薩之身

蝙蝠蟲一念心卽成聖道

况今生不信佛永墮沉淪

此錄一卷。建寧華嚴弟子陳竑所集也。正法之時。南海岸邊有五百蝙蝠。穴於枯樹。樹下有一道人。誦阿毘達磨論。復有商人附火樹下煮飯。不時火發。其樹被焚。五百蝙蝠貪聽法音。被火所焚。次夕見五百人來禮拜。師曰。汝等何方賢士。答曰。我等生前五百羅漢。悞犯戒律。打入蝙蝠蟲類。今蒙法力。得脫惡報。已生人中修道。得證阿羅漢果。特來禮謝。頌曰。枯樹潛藏蝙蝠蟲。專心聞法悟圓通。火燒五百成羅漢。何況爲人反不從。

清華寺鸚鵡兒求生淨土

聽法語念彌陀要求往生

鸚鵡兒一念心歸家去了

况今生不信佛永墮沉淪

本錄云。昆山清華寺有一人養一鸚鵡。又名八哥。近寺居住。見僧念佛。亦學念佛。遂捨與僧。常隨念佛。一日低頭斂翼而終。主僧憐之。盛以小棺葬之。山後。不日葬處生蓮花一朵。合郡人往觀之。師乃開其葬處。只見蓮花從舌上而生。師嘆曰。飛禽念佛。舌上生蓮。人爲萬物之靈。若肯信心。勝他萬倍之功。偈曰。有一

飛禽鸚鵡兒。解隨僧口念阿彌。死埋平地蓮花發。我輩爲人豈不如。

藏經中有說

往昔時鳩摩羅尊者說法。有雉雞聽法音。卽轉人身。轉人身一念心。卽成佛道。況今生不信佛。永墮沉淪。景德傳燈錄三卷。鳩摩羅多。十九祖也。五燈云。乃月氏國婆羅門子。得法十八祖伽耶舍多尊者。鳩摩專誦華嚴。常有雉雞來聽。因茲法力。卽轉山後王宅爲子。後成佛道。頌曰。大方廣佛華嚴經。雉雞親聞卽轉人。如是匾毛成佛道。爲人不似那飛禽。

覽集十善品。經律異相云。

往昔時佛說法。蛤兒聽法。從池中涌出來。側耳聽經。蛤兒蟲臨命終。超生天界。在天宮得證了羅漢之身。經律異相云。迦羅池邊。有一蛤兒。聞佛說法。卽從池出。入草根下。時有牧牛童子。前詣佛所聞法。以杖刺地。誤傷蛤身。蛤兒爲法忘軀。托生忉利天宮。自思我先爲畜。因何生此天宮。得宿命通知聽法故。卽乘天人宮殿。往至佛所禮謝。佛爲說法。得須陀洹果。頌曰。佛演真經異類聽。迦羅池內蛤超昇。今人若不歸三寶。直待驢年出苦輪。祖引蟻子五類。發心聞法。皆成

佛道。今人頂天立地。六根具足。何故不信佛法。自招苦報。反不如匾毛之異類也。

今是古。古是今。信心無二。大乘法。要不信。永墮沉淪。空喫齋。不信佛。還有地獄。殺生人。信得急。得證金身。正信希。世間少。毀謗正法。墮無間地獄。裏永不翻身。佛的言。你不信。可信誰語。佛國土。你不去。何處安身。無量劫。受苦惱。今日纔得。這一遭。要不信。永墮沉淪。此頌警策。不信之人。空有喫齋虛名。難逃地獄惡報。若肯正信除疑。一信更不復迷。發願拈香。爲佛弟子。超過一切異類。勝彼殺業衆生。信佛之言。居佛之國。有何不可。有何不樂也。上言往生淨土。經旨一品已竟。偈曰。

平生造業業無形

一念回光徹底清

罪性本空空無相

法身常覺覺虛靈

皮囊變做明珠庫

苦海翻爲淨土城

無量惡因從此滅

縱橫自在獨爲尊

尙衆類得正法歸家品第四

此經一品。主意二科。一者。舉類示人也。祖見世人。埋頭錯路者多。明心見性者少。故立此經示之。尙衆類。野狐六類。得正法。指明心性。歸家者。還原之義。如人

飄流在外。今日還歸本家。祖言衆類聞法歸家。勉人及時參道。勝彼萬倍之功。人而不爲。又不如異類矣。品題解竟。偈曰。

衆類同歸不二門。

宿生根正又重新。

披毛戴角非爲畜。

圓頂方袍假號僧。

萬象森羅同鼻孔。

恒沙諸佛共元神。

果然如是知端的。

步步頭頭轉法輪。

金剛科儀云。野狐尚聽百丈法。

解曰。我祖先立品題。次引古教。金剛科儀宋宗鏡禪翁所作。發明金剛大旨。此出序分。野狐尚聽百丈法者。洪州百丈山。懷海禪師。福州長樂人。得法馬祖。南嶽二世也。每日上堂。有一老人隨衆聽法。一日衆退。唯老人不退。師問。汝是何人。老人曰。某非人也。於過去迦葉佛時。曾住此山。有學人問。大修行人。還落因果也無。某對曰。不落因果。遂五百生墮野狐身。今請和尚代一轉語。脫野狐身。師曰。汝試問來。老人曰。大修行人。還落因果也無。師曰。不昧因果。老人於言下大悟。作禮曰。某甲已脫野狐身。住在山後。乞依亡僧例送。師令維那白椎。告衆曰。食後送亡僧。大衆聚議。大衆咸安。涅槃堂裏。又無病人。何故如是。食後師領

衆至山後岩。以杖挑出一死野狐。乃依法火葬之。頌曰。百丈親曾見野狐。爲渠參請太心粗。而今敢問諸禪客。吐得狐涎盡也無。

螺螄猶護金剛經

金剛感應傳云。唐王待制。船至漢江。風濤洶湧。滿船驚惶。遂將平日所誦金剛經。投於水中。卽時風恬浪靜。待制深憶此經。鬱鬱不樂。經涉兩月。方至鎮江。見船尾百步外。似有一物。出沒無時。衆人疑慮。制令漁人取而視之。乃是螺螄混成一球。剖而觀之。外濕內乾。卽是所持之經。毫髮無損。待制驚喜。作禮嘆曰。漢水至此。有數千里。舟船往來。不可數計。未聞有見是經者。螺螄一見而不捨。其爲名耶。利耶。財耶。色耶。將必求脫輪迴生死也。嗚呼。萬物之中。唯人最靈。其有畢生不聞是經者。有聞而不見。見而不信。信而爲名利財色。蕩沒不能受持者。尚螺螄之不如。謂之最靈者。孰與之哉。

十千遊魚聞佛號。化爲天子。

金光明最勝王經。佛告菩提樹神善天女。持水長者。子名流水。在天自在。光王國內。爲大醫王。妻名水肩藏。有二子。一名水滿。一名水藏。長者與二子。到一大

澤中有一大池名曰野生。枯涸無水。魚皆將死。生大悲心。時有樹神示現半身。與長者言。此魚可憐。汝名流水。當可與水。長者曰。魚有幾何。樹神曰。此魚十千。日曝水少。將入死門。長者遶池經行。魚隨瞻視。長者尋取樹枝。用作陰涼。四面覓水。忽見一河。名曰水生。令子至光王殿前。具奏上事。王令自選有力大象二十頭。城中復借皮袋。至河馱水。瀉水平滿。取一大力之象。令子白祖。取食施魚。馱至池邊。悉置池內。長者依教所說。高聲稱念。南無寶髻如來。應供十號。又說十二因緣。其魚命終。生三十三天。各悟前因。悉來酬謝。時長者夜臥。十千天子各持瓔珞。至長者家。以十千天妙瓔珞。置於頭邊。其足兩脇。四處皆然。又雨四花。作天音樂。瞻部眠者皆寤。復至池邊。雨花。明日王問羣臣。昨夜何緣。有如此瑞。羣臣奏曰。長者家瑞也。令召長者。問如上事。長者奏王。恐十千魚而得生天。待臣至池。觀魚死活。遂至池邊。見魚皆死。多有四花徧滿池中。長者回奏光王。是魚定生忉利。王聞歡喜。佛告善天女。長者子。我身是。天自在光王。卽汝是也。大乘本生心地觀經。偈言。流水長者大醫王。平等救護衆生故。濟魚各得生天上。天雨瓔珞來報恩。

五百蝙蝠聽法音。總作聖賢。

解前三品

蟒聞懺以生天。

慈悲道場懺法序云。此懺者。梁武帝爲郗氏所集也。郗氏崩後數月。帝常追悼無休。晝則忽忽不樂。夜則耿耿不寐。居寢殿間。忽得一夢。聞外有騷宰之聲。視之。乃見一蟒。盤躡殿上。睽睛呀口。以向於帝。帝大驚駭。無所逃遁。王謂蛇曰。朕宮嚴警。非爾蛇類所居之處。必其妖孽。欲崇朕耶。蛇爲人語。啓帝曰。蟒卽昔之郗氏也。妾以生前嫉妬六宮。害人多矣。死以是罪。隸爲蟒耳。無飲食可實口。無窟穴可庇身。鱗甲小蟲。咬齧肌肉。猶若錐刀。蟒非常蛇。亦復變化而至。不以皇宮深重爲阻耳。感帝平昔眷妾之厚。故托醜形。陳露於帝。祈一功德。以見拯拔也。帝聞之。嗚呼感激。醒而求蟒。遂不復見。帝明日。大集沙門於其殿。宣其由。問善之最。以贖其苦。誌公對曰。非禮佛懺。莫能救之。帝然其言。乃因前朝良蕭氏之舊制。搜索佛經。錄其名號。兼親抒睿思。灑聖翰。撰悔文。刪煩撮要。改成十卷。皆採摭佛語。總列四十品章。將及二千餘禮。滌過去之惡因。植當來之種智。題名慈悲道場懺法。請僧懺

禮。又一日。聞宮中異香馥郁。良久轉美。初不知所來。帝因仰視。乃見一天人。儀容端麗。謂帝曰。吾乃蟒後身也。蒙帝功德。生忉利天。殷勤致謝。言訖不見。故曰。蟒聞讖以生天。

龍聽法而悟道

六祖外紀云。梁天監元年。智藥三藏。從西竺國航海而來。自南海經曹溪口。掬水而飲。香美異之。謂其徒曰。此水與西天之水無別。溪源上必有勝地。堪爲蘭若。隨流至源上。四顧山水回環。峯巒奇秀。宛如西天寶林山也。乃謂曹侯村居民曰。可於此山建一梵剎。將彼土菩提樹一株。植戒壇畔。預誌曰。一百七十年後。當有肉身菩薩。於此樹下。開演上乘。度無量衆。真傳佛心印之法主。得道者如林。宜號寶林。時韶州牧。候敬中。以其言具表聞奏。上可其請。賜寶林爲額。遂成梵宮。師卽居之。至天監三年。寺前有潭一所。龍常出沒其間。一日現形甚巨。波浪洶湧。雲霧翳空。徒衆皆懼。師叱之曰。你只能現大身。不能現小身。若爲神龍。當能變化。以小現大。以大現小也。其龍忽沒。俄頃復現小身。躍出潭面。師展鉢試之曰。你且不敢入。老僧鉢盂裏。龍遊至前。師以鉢接之。持鉢上堂。與龍說

法龍遂蛻骨而去其骨長可七寸首尾角足皆具故曰龍聽法而悟道。

彼物尚能領悟況人何不同心。

此結前六種異類一聞妙法尚能領悟得益何況人爲最靈若不同心參道反不如異類之得正法歸家也。上言舉類示人一科竟○下言愚人不省二科也。或有埋頭喫飯而空過一生。

此點愚人不省修行也。或有一等緇白之流雖然回心不修戒定慧慣使貪嗔癡趁俗打哄埋頭喫飯可惜空過一生向袈裟下失却人身真爲苦哉。

或有錯路修行而不省這意。

此句大申禪病也。雖在空門學道不從正教歸向邪宗不省這箇大意正是錯路修行。永明壽禪師曰。或起殊勝知解而剗肉爲瘡。或住本性清淨而執藥成病。或尋文探義而飲客水。或守靜闕居而坐法塵。或和神養氣而保自然。或苦質摧形而爲至道。或認妄而謬附邪宗。或執權而勞修漸行。長沙岑禪師頌曰。學道之人不識真。只爲從前認識神。無始劫來生死本。癡人喚作本來人。此明真諦理中。但起纖毫執着之見。卽是錯路修行。

豈識菩提覺性。箇箇圓成。爭知般若善根。人人具足。
此言埋頭喫飯。錯路修行者。他豈識得菩提覺性。箇
箇圓成也。下二句。與上文異理同。唯心訣云。不知全
體現成。猶希妙悟。豈覺從來具足。仍待修持。
莫問大隱小隱。休別在家出家。不拘僧俗。而只要辦心。
本無男女。而何須着相。

此言覺性善根。箇箇圓成具足。大隱小隱。總是一般。
在家出家。更無兩樣。故曰。莫問休別也。僧俗男女。雖
有異。菩提覺性本無差。故曰。何須着相。

未明人妄分三教。了得底同悟一心。

未明人。各執已見。興一教而厭一教。了得底。共合一
光。會三教而歸一心。天下之理。不過善惡二途。三教
聖人。總是勉人爲善。古德云。皇天無二道。聖人無兩
心。故曰。同悟一心。

若能返照回光。皆得見性成佛。

此結前覺性圓成也。在家出家。四衆人等。若能返照。
則不逐根塵。能回光。則見自本性。見性卽名成佛。佛
性箇箇圓成。故曰。皆得。前文已竟。偈曰。

野狐蟲求百丈。得成正覺。聽妙法。成正覺。亦得還原。
野狐蟲信得急。成佛去了。空爲人。不信佛。永墮沉淪。

此偈至下。重頌上文。舉類示人也。且道野狐聽法。如何卽得成佛。法華云。若有聞法者。無一不成佛。

螺螄蟲護金經得成正覺。護真經成正覺亦得還原。螺螄蟲聽妙法歸家去了。空爲人不信佛永墮沉淪。

歸家卽是成佛。歸家乃還原之義。成佛是見性之功。十千魚聞佛號信聽正法。聽妙法成正覺亦得還原。十千魚聽妙法歸家去了。空爲人不信佛永墮沉淪。

正法者卽上妙法真經也。正法離諸邪見。真經不是妄言。妙法非同世典。成正覺得還原。卽是成佛歸家也。

窟蝠蟲五百箇信聽正法。聽妙法成正覺亦得還原。

窟蝠蟲聽妙法歸家去了。空爲人不信佛永不翻身。

永不翻身。卽上永墮沉淪。宗鏡云。人身易失。佛法難逢。易失如片雪飛爐。難逢似盲龜值木。

蟒蛇蟲聽妙法得成正覺。聽妙法成正覺亦得還原。蟒蛇蟲聽妙法歸家去了。空爲人不信佛永不翻身。

蟒聞懺以生天。如得衣裏明珠。今人得聞佛法。當生難遭之想。華嚴云。寧地獄中。多劫受苦。常要見佛。不願離於三途。而生無佛法處。

龍聽法悟明。心得成正覺。聽妙法成正覺亦得還原。龍聽法悟明。心歸家去了。空爲人不信佛永不翻身。

正信
這等物領佛法歸家去了。空爲人不信佛永不翻身。神龍聽法歸家去。爲人不信也徒然。後二句頌前彼物尚能領悟。况人何不回心。結上六種異類尚知領悟。還原。爲人若不明心。一失人身不復。上頌舉類示人。下頌愚人不省。

護真經成佛位歸家去了。謗正法下地獄永不無間。地獄裏無間斷永下地獄。地獄裏無間斷永不翻身。此頌愚人不省。而有地獄之苦。前二句信謗不同。苦樂自別。後二句復申無間之義。這獄出那獄入地獄受苦。難復人身。又引武帝証之。

周武帝地藏卷永受重苦。地獄裏鐵鎖住永不生天。造重罪受重苦還有了手。謗正法下地獄永不翻身。地藏卷作證見不是誑語。地藏卷周武帝不得生天。地藏卷者。全題名曰地藏閻羅十王卷。內有十殿閻君。判斷罪福等事。後有地藏菩薩入獄。放大光明。十王朝禮。此引第八平等王。有周武帝謗法。覽集持誦品。金剛感應傳云。隋開皇中。有太府寺丞趙文昌。死而復活云。有人引至閻羅王所。王問一生以來作何福業。答云。家貧無力。可營功德。惟持金剛般若。王聞合掌讚言善哉。功德甚大。卽放還生。使人引至南門。

首見周武帝在門側房中。三重鐵鎖。喚昌云。卿既還家。爲吾向隋皇帝說。吾有諸罪受了。惟有謗佛法罪。難可得竟。乞爲營功德。得出地獄。傍鬼聞曰。帝欲出苦。除是大千千日。不說非言。堪脫。昌歸得活。遂奏其事。文帝卽勅天下人。爲武帝轉金剛經。普設大供。以資冥福。古德頌曰。謗法毀僧。周武帝。迷心作業。罪滔天。征夫鈔賞分金佛。東園填坑紙土顏。死墮陰司拴鐵柱。鄴都關鎖鬻愁烟。面會文昌求解救。大千千日免非言。

科儀云。欲得不招無間業。莫謗如來正法輪。

此引結上武帝受苦。因謗如來正法。舉過去。以勉未來。離三途。當淨口業。昔唐勾龍義。閬州人。傭力自給。於長慶三年。邑人有疾。乃徃省之。見寫金剛經。毀謗而止之。言便瘡。瘡醫不能愈。每聞鄰人誦經。自責云。我謗此經。故瘡。若能愈者。終身敬奉。每念經時。倚壁聽之。疑若念得熟。一日偶入寺中。逢一老僧禮之。僧問何事。遂指口曰。瘡。僧以刀割舌下。便能言語。念經如鄰人之聲。後訪此僧不見。忽於壁上見畫須菩提。乃曰。此是割舌僧也。由此觀之。武帝謗法。而有地獄之苦。龍義毀經。卽招現在之報。佛法可信。而不可謗。

也明矣。上言衆類得正法歸家經旨一品二科竟。日

懼怕生死辨修行 正信除疑莫改更

麟聞寶懺生天界 龍聽靈文脫幻身

衆類尚能聞妙法 諸人何不悟真心

死後要免三途苦 生前莫謗大乘經

無極化現度衆生品第五

此經一品主意二科。一者劫量受苦也。世人逐境迷心。永劫受苦無盡。故立此經爲人示之。無極者。天地之根。萬物之母。無有一法可極。卽太虛之異名。真空之假號。化現度衆生者。無中生有。隱顯莫測。一切聖賢出世。皆因救度衆生。古德云。天下善知識。古佛下雲端。金剛經云。一切諸佛。及諸佛阿耨多羅三藐三菩提法。皆從此經出。此經卽無極也。無極化現詳後二科。品題解竟。偈曰。

無極聖祖駕法船 普度三千及大千

現身酬願臨凡世 隨類開迷復本原

佛祖度人無誑語 聖賢化衆有真言

古今不滅如來焰 不度無緣度有緣

又云。自從無量劫。轉四生六道。諸惡趣中受苦。脫骨過於須彌山。今得個人身。水中撈月。輓芥投針。難中又難。

此言劫量受苦。人身難得也。首品言劫量長遠。二品嘆人身不久。此品復說劫量而嘆人身。故以又云而爲起語也。無量劫者。非百千等歲數可知。脫骨過於須彌山。大顛有云。轉一隻白狗犬。積身骨。如須彌山。吃娘乳。似大海水。別殼轉骨。無量無數。此言過去無量劫。諸惡趣中受苦。苦盡方得人身。仔細觀來。實是難也。做衆生。到有無量劫。得人身。尚無一百年。失人身。易。如風吹葉落地。似人擲石投淵。得人身。難。如海用手撈月。似山輓芥投針。水中撈月。有影無形。輓芥投針。有體無用。故曰難中又難也。

國王大臣。功侯伯子。軍民人等。認定浮生虛花境界。又認定富貴榮華境界。又認定畫梁斗拱。清堂瓦舍境界。障惡貢高名利。殺生害命。這些諸心雜意。障瞞了真心。障瞞了本來面目。全不想曠大無量劫來。轉四生六道。諸惡趣中。受苦無量。又不想今生作下業障。又去轉四生六道。諸惡趣中。一失人身。萬劫難難。難時永不得翻身。國王者。人中帝主。大臣者。朝內公卿。公侯伯子。皆爵名也。盡是國內之臣。軍民人等。皆人名也。盡是國內之民。此言上自天子。下至庶人。都認現在虛花境界。不究自己清淨法身。這些諸心雜意。總指浮生等事。

多種非一念也。障滿二句。逐妄迷真。蓋覆實相。如雲掩月。不現光明。全不思過去未來之苦。人身難得。易失。下復引教証之。

水懺中說四空天。天主福盡。還作牛領中蟲。

此出中卷引證上文四空天主福盡。尚有牛蟲之報。人間福盡業來。豈無惡道之苦。懺云四空果報。三界極尊。福盡還作牛領中蟲。上言劫量受苦一科。竟。○下言無極化現二科也。

無極聖祖。大慈大悲。恐怕衆生。作下業障。又轉四生六道。不得翻身。故化現昭陽寶蓮公主太子。嘆退浮雲。一切雜心。顯出真心。參道。究這本來面目。出離輪迴。生死苦海。

此合下十一公案。皆明品題。無極化現度衆生。無極者。太極之體。寂然不動。卽佛清淨法身也。靜極而動。生天生地。生人生物。生生不息。卽佛百億化身也。圓覺卷云。萬物靈光。無極生。立天立地。立人根。聖祖者。無極之號。慈悲者。聖祖之德。無極聖祖。愍念衆生。猶如一子。故爾化現昭陽四口。普度一切愚痴。昭陽卷云。昭陽。乃旃檀舍利國王也。寶蓮。皇后也。公主。純陀也。太子。寶光也。嘆退浮雲四句。昭陽修行實事也。一

家四口各爲生死事大。昭陽不貪九五之貴。不戀四海之富。棄國城如敝屣。捨妻子若秋毫。得成無上菩提。與後人作個樣子。嘆世六品廣明。

又化現鹿王善友惡友。金牛太子。勸化衆生。

如來十世修因傳云。佛修三大阿僧祇劫。然後成正覺。茲舉三事。初世爲鹿王。六世爲善友。七世爲金牛。總是勸化衆生也。鹿王金牛。偈內詳之。善友惡友者。報恩四卷惡友品。昔毘婆尸佛末法時。波羅奈國有摩訶羅闍王。生二太子。一名善友。一名惡友。善友奏父願施庫藏。普濟衆生。奏施未幾。庫藏皆空。太子發願入海。欲求摩尼寶珠。王言。海難不一。徃多還少。

王示衆臣。能入海者。七世衣食豐饒。卽有五百人願從。爾時本國有海師。善知海道。年已八十。兩目昏盲。王謁曰。吾子入海。願師隨之。師哭曰。海苦非一。太子涉險。吾不敢違。師卽統衆赴海。惡友奏父曰。願隨兄往。王准同行。至海。七鎖鎖船。停住七日。善友擊鼓唱令。入海者默然。戀家者還國。大衆默然。卽斷一鎖。至第七日。七鎖盡斷。望風舉帆。無諸畱難。至海洲珍寶山。善友令諸人取寶先回。乃與海師同進。路行一七水齊膝。復行一七水到頸。前進一七浮而渡。及到海

處地盡銀沙。東南有白銀山。現師言。路在此山。至山師力疲乏。語太子言。我命必喪於此。太子東行一七。當有金山。復行一七。地有青蓮。再行一七。地有紅蓮。過此有七寶城。龍王左耳中。有摩尼如意寶珠。此珠能滿閻浮提。雨衆七寶。衣食藥音。一切隨意能雨。故名如意寶珠。若得此珠。必滿本願。語畢命終。善友抱哭埋沙而去。東行二七。見青蓮花。下有青毒蛇。太子入慈心三昧。蹋華而過。遂至龍王住處。其城毒蛇交頸護門。一見太子。開路令入。入城至門。守門者白王。波羅太子。特來見王。王言。若非福德之人。無由遠涉險路。入宮相見。心大歡喜。乃曰。遠涉至此。欲須何物。太子言。衆生爲衣食受苦。欲求如意寶珠。王言。受供七日奉給。太子得珠。王使龍神送回。見弟問曰。汝伴何在。答曰。船沉盡死。唯弟一身。善友言。天下大寶。莫先已身。弟言。人願富死。不願貧生。善友解髻中寶珠。與弟誠言。汝疲我守。我眠汝護。至苦竹林。善友倦臥。惡友將二乾竹。刺兄兩目。奪珠而去。善友喚弟。有賊刺目奪珠。樹神報言。汝弟惡友是賊。善友飲氣不提。惡友還國。父母不見善友。悶絕躡地。兩目失明。良久乃甦。惡友以珠埋地。爾時善友。偶至刹師跋王國。王

女先許波羅奈王善友太子。遇一牧人。爲王牧五百牛。善友坐道。牛王以足罩身。俟諸牛過。然後移足。牧人驚視異相。引家供養。一日辭牧人曰。乞爲我作一箏。送至利師跋城。善友彈箏。悅可衆心。衆共給之。道上五百乞兒。皆得飽滿。復爲王守果園。王女一見。欲爲夫婦。善友曰。汝是王女。我是乞人。云何能有真心。而無私乎。王女對夫誓曰。我有私心。汝目不瘥。若不爾者。一目如故。其夫一目卽明。善友笑曰。我是波羅奈王太子。我若妄語。一目永不得愈。卽時兩目如故。二人見王。王卽遣送彼國。父母聞歸。相接喜甚。以手摸太子曰。汝是我子善友耶。善友啓父曰。我弟何在。王乃獄中赦出。相見。善友問弟曰。珠在何處。言在土中。善友掘地。取珠見父。祝曰。此珠寶是如意寶者。令我父母。目明如故。言畢。其目卽明。善友沐浴焚香。頂禮摩尼寶珠。對天祝曰。我爲衆生。求是寶珠。爾時東方風起。吹開雲霧。閻浮清淨。遍雨粳米。色味具足。次兩名衣釵環。次雨七寶音樂。一切所須。皆悉充滿。菩薩發大慈悲。行檀波羅蜜。給足一切衆生樂具。其事如是。佛告阿難。波羅奈王悅頭檀母。卽摩耶夫人。是提婆達多是惡友。善友太子是我身。提婆常懷害我。

意我以忍辱常施恩。因此得成無上道。衆聞皆發菩提心。我祖舉此一則。勸化今時兄弟。勿因此小利。傷殘手足情。故曰。化現善友惡友。勸化衆生。

科儀云。地獄裏受五百劫苦。又轉四生六道。不得翻身。衆生不知有地獄苦。又化現目連清提。地獄勸化衆生。序分有云。十二時甘受苦辛。五百劫不見頭影。五百劫者。較量壽命經云。人間壽命五十歲。四天王天一晝夜。彼天壽命五百歲。活大地獄一晝夜。如是乃至人間一千六百年。他化自在一晝夜。自在一萬六千歲。焰熱地獄一晝夜。法苑珠林偈曰。四天王天五百

劫。一活地獄一晝夜。次配忉利夜摩等。乃至第八阿鼻王。人間六十小劫終。獄中方當一晝夜。十二時者。阿毗地獄十二時。人間算有六十劫。阿毗獄中五百劫。人間算數莫能知。地獄苦盡。又轉畜生。覽集地獄品。大地獄有八次。地獄有十。是名十八地獄。頌曰。活黑繩并石碓。叫喚大叫并熱焰。及大燄熱阿鼻王。因本經名八地獄。初七各濶五百旬。後一三十二萬里。有情上品惡所生。各各眷屬有十六。目連者。梵語目犍連。此云採菽氏。姓也。梵語俱律陀。此云無節樹名也。與舍利弗。二爲親友。各五百弟子。共詣佛所。以

求出家。佛告大眾。今此二人爲上弟子。舍利弗。智慧第一。目犍連。神通無上。目連傳云。舍衛國中。傅相長者。有夫人劉氏清提。所生一子。乳名羅卜。投佛出家。法諱目連。清提破戒。死入地獄。目連行孝。救母生天。衆生不信地獄苦。化現清提勸衆生。

衆生在浮生境界。管一切雜事。不得靜處。叅道失了人身。永不得翻身。又化現飯王太子。引化衆生。雪山靜處。叅道明心見性。躲離輪迴生死苦海。來到家中。先度道伴耶輸。又度父母爹娘。又度兒子羅睺羅太子。次後普度無量無邊衆生。自成正覺。躲離輪迴生死苦海。

此文一節。義有六段。按經作解。化現飯王太子者。佛本行集經云。爾時護明菩薩。從迦葉佛所。護持禁戒清淨。命終生兜率天。一生補處。名聖善慧。爲諸天王說法。實以三祇因滿。萬德果圓。惟有宿願未周。示生滅相。期至當下。作佛觀迦毘盧國。處閻浮提中。淨飯聖王。種族第一。王姓釋迦。夫人摩耶。堪爲父母。因母晝寢。以示其夢。夫人見菩薩。從日輪中。駕白香象。騰空而來。從右脇入。顧見自身。如日月照。旣覺說夢。王召婆門至。占曰。夫人必懷太子。若不出家。爲轉輪王。夫人夢寤。自知身重。天獻飲食。自然而至。不復樂人。

間之味。菩薩住胎。十月滿足。夫人將諸綵女遊毘嵐
尼園。無憂樹下。又名波羅叉。夫人舉手取花。聖子右
脇而誕。帝釋四天抱太子於母前。無人扶持。太子四
方各行七步。舉足出大蓮花。目視四方。手指上下。口
自唱曰。天上天下。惟我獨尊。是時放大光明。普照大
千世界。群生普利。地獄停酸。地湧二池。一冷一暖。九
龍吐水。浴太子身。諸天音樂香花。大地六種震動。是
時此土。正周昭王甲寅二十六年。按鑑昭王元年已
丑。甲寅乃二十六年。舊四悞矣。四月八日。是日江河泛

溢。宮殿震動。有五色光貫太微宮。王問群臣。太師蘄
由奏曰。西方有聖人生。却後千年。教來此土。王令鑿
碑埋於南郊誌之。又說是日。八大國王皆生太子。諸
釋種姓。生五百男。國中居士長者。亦悉生男。四萬八
千廐馬。悉生駒。宮中五百伏藏發現。大商採寶俱還。
卽名太子。爲悉達多。漢言頓吉。王請仙人阿私陀瞻之。仙
曰。太子具足三十二相。八十種好。在家作轉輪王。出
家成無上道。以臣觀之。必不得在家矣。言畢而泣。王
問何故。仙曰。太子成佛。必施大法。臣老百二十歲。惜
乎不及覩。○雪山靜處叅道者。釋迦譜云。釋迦在宮
日久。白父欲出遊觀。王勅清淨衢道。東門見老南門

病。西門逢死北門僧。回宮不樂。心想出家。是年十九
壬申。卽於二月八夜。淨居天人報曰。太子出宮。今正
是時。太子卽勅車匿。被犍陟來。四天天王。捧馬四足。
北門自開。出城而去。正宗記云。先入彌樓寶山。習不
用處。定三年。復進鬱頭藍弗處。習非非。想定三年。後
移象頭山。又名雪山。雜外道輩。爲之苦行。日食一麻
一麥。居六年。外道亦化。普曜經云。六年之中。勤修苦
行。春夏秋冬。巍然端坐。鵲巢樹上。抱卵糞污其身。不
棄。苦行六年。瘦如枯木。乃自思曰。今此苦行。非正解
脫。吾當受食。而後成佛。後有林外牧女。取乳供養太
子。身體光悅。堪受菩提。帝釋化人。獻瑞草。以爲坐太
子。是年二十。穆王癸未四年。二月七日之夕。入正三
昧。八日明星出時。廓然大悟。成等正覺。故曰。明心見
性。躲離輪迴生死海。○先度道伴耶輸者。傳法正宗
記曰。太子十七。王爲娉妃。婆羅門女。名耶輸陀羅。卽
往因賣花女也。雖同世娶。非有凡心。太子心欲出家。
父王言曰。國今無嗣。宜生一子。却聽出家。太子卽指
妃腹曰。此後六年。當生一男。是年十九。佛卽出家。修
諸苦行。莊嚴經云。時佛三十成道。回宮坐殿說法。耶
輸陀羅。携羅睺羅。稽首佛足。而白佛言。太子去國。十

有二年。自從懷孕。生羅睺羅。釋種眷屬。皆有疑心。佛語父王及諸羣臣。耶輸貞潔。無有瑕疵。若不信者。今當取證。世尊化諸比丘。皆悉如佛無異。時羅睺羅年已七歲。耶輸以指印信環。與太子言。是汝父者。以此與之。太子直詣佛前。卽以信環奉之。王與羣臣。嘆言善哉。羅睺羅。真是佛子。佛語父王及羣臣曰。從今已後。無復懷疑。此子緣吾化生。勿咎耶輸陀羅也。耶輸聞說。心生歡喜。頓發菩提心。卽時成佛道。故曰。來到家中。先度道伴耶輸。○又度父母爺娘者。本行經云。太子誕生七日。夫人往生忉利。語淨飯言。我懷孕時。受於快樂。今生忉利。還受快樂。願莫爲我生惱。言畢。隱身而去。淨飯卽將太子。付囑姨母。摩訶波闍波提言。汝是太子姨母。應當養育護持。又揀三十二女。令助養育。八女抱持。八女洗浴。八女令乳。八女戲弄。太子不似世之嬰兒。流淚不淨。無有糞穢。亦不啼哭。亦不饑渴。養育之女。常生歡喜。經言度父母者。卽淨飯之父。波提姨母也。世尊涅槃。從金棺出。爲摩耶夫人說法。又不同此論矣。○又度兒子羅睺羅太子者。未曾有因緣。經佛在迦毗羅衛國。遣目連白父及耶輸曰。太子羅睺年已九歲。應令出家。耶輸答曰。如來娶

我爲妻。未滿三年出家。今復求子。何酷如之。佛遣淨居天。空中告曰。汝憶五百銀錢。買五莖花。上普光佛。併寄二花獻佛。願與我。世世爲妻。我言菩薩行願。一切布施。不逆人意。汝能爾者。聽我爲妻。汝立誓願。施無悔心。耶輸卽識宿命。愛子之情頓消。捉羅睺手。付囑目連。時淨飯王。集國豪族。各遣一子。隨從我孫。有五十人。同往佛所。羅睺聽法。遂證四果。○次後普度無量無邊衆生者。涅槃經云。世尊住世四十九年。說法三百餘會。化度四生六道。其數無量無邊。後至漢孝明帝。永平十年。丁卯之歲。而教被華夏。稽古略云。

永平七年。帝夢金人長六項。有日光。飛至殿庭。旦問羣臣。太學聞人。傅毅奏曰。周昭王時。西域有佛出世。其形長一丈六尺。而黃金色。陛下所夢。將必是乎。帝遂遣蔡愔。秦景等。一十八人。使西域求佛法。至天竺隣境。月氏國。遇梵僧攝摩騰。竺法蘭二人。奉佛經像來震旦。東土也遂同東還。摩騰入闕獻經像。帝大悅。館於鴻臚寺。又於城西雍門外。別立一寺。騰蘭居之。以白馬馱經而來。遂名白馬寺。永平十四年。五嶽道士費叔牙等。忌之。斥言虛僞。騰蘭白於帝曰。吾佛出世間法。水火不能壞。請與方士驗之。帝勅叔牙等。盡出

奇經秘訣與沙門所持來經像就焚之。正月十五日
火作。而沙門諸經。完然不燼。方士稽首欽服。帝益異
之。由是騰蘭習漢言。久之。譯四十二章經。十地斷結。
佛本生。法海藏。佛本行等五經。至今大行中國。故曰。
普度衆生。自成正覺。躲離輪迴生死苦海。
無極聖祖。恐怕一切衆生。一失人身萬劫難。大慈大悲。
普度衆生。退開浮雲。魔心顯出真心。參道躲離輪迴生
死苦海。

此文總結上義。無極聖祖。發大慈悲。光中化顯聖賢。
普度衆生。出苦。魔心是生死之本。真心是成佛之根。
魔退真纔現。雲消月自明。前文已竟。又引

科儀云

人命無常呼吸間

眼觀紅日落西山

寶山歷盡空回首

一失人身萬劫難

此引五分重頌首科。劫量受苦。人身難得也。前二句。
法喻雙彰。人之命根。只在出呼入吸之間。一息不來。
千秋永別。喻如紅日東昇。不覺又從西墜。四十二章
經云。佛問諸沙門。人命在幾間。對曰。在數日間。佛言。
子未知道。復問一沙門。人命在幾間。對曰。在飯食間。
佛言。子亦未知道。復問一沙門。人命在幾間。對曰。呼

吸之間。佛言善哉。子可謂知道者矣。後二句舉喻警人。今生得箇人身。喻如一座寶山相似。有人於此山中。若取寸草。焚向罏中。煙到處。土木瓦石。樓臺殿閣。悉作黃金。故名寶山。歷經也。遊也。既是經遊此山。不可空手而回。若不取一草一葉歸家。可謂癡人矣。爲人在世。不發菩提心。不修戒定慧。命終之後。又入輪迴。故曰空回首。再想得箇人身。萬劫亦難復矣。

無極聖祖來托化

化現昭陽嘆人心

無極聖祖來托化

化現寶蓮勸衆生

此偈至下。重頌二科。無極化現也。昭陽寶蓮。一家四

口同悟一心。重道德如寶貝。輕富貴似浮雲。此勸今時夫婦。都要同修同証。休如傅相清提。地獄天堂各別

無極聖祖來托化

化現鹿王嘆人心

如來修因傳云。昔日金波國內。有一鹿王。七寶林中。同鹿遊戲。忽然金波國王。勅令人馬捕鹿。羣鹿驚散。四野。鹿王直至王前。俯伏在地。口吐人言。獸乃羣鹿之首。今有一言啓奏。願王暫收人馬回宮。每日差撥一鹿奉養。聖意如何。王聞准奏。次日早朝登殿。果獻一鹿前來。王見歡喜。嘆曰。畜生有此忠信。令收御苑養之。七日如期不失。八日無鹿可進。九日鹿王至殿。

奏曰。臣罪當誅。乞恩准奏。昨差一鹿。有妊未生。乞容兩日。方來受死。有逆聖恩。伏望赦之。王聞嘆曰。畜生野獸。尚懷母子之情。鹿王爲君。到有仁慈之念。朕爲一國之主。豈無惻隱之心。因我口腹之欲。至彼身命之災。王對鹿曰。前日所進之鹿。我俱養在御苑。從今已後。更不餐葷。封鹿爲善鹿。王菩薩。七寶林爲御鹿。花苑仍出榜文。曉諭軍民人等。不得擅入林中。如違先斬犯身。後誅九族。鹿王謝恩而退。我祖引古勸今。休貪口味。莫殺生靈。明君遇鹿。早回心。智者聞經。宜速信。

無極聖祖來托化

化現金牛勸衆生

如來修因傳云。昔日波利國王。有三皇后。一名殊勝。二名淨德。三名普滿。國王夜得一夢。夢見金殿崩摧。龍旗倒折。次日升殿。將夢說與羣臣。有臣范察奏曰。國有不安之兆。聖上宜往清涼山避暑百日。方保無事。帝准其奏。卽宣三箇皇后上殿。問曰。朕避暑回朝。各有何物迎接。殊勝奏曰。妾有四季之果。接之。淨德奏曰。妾有御衣一領。接之。帝皆不悅。普滿奏曰。妾身有妊。八月。抱一太子。接之。帝聞大悅。卽勅生婆侍奉。帝統大臣人馬。前往清涼山避暑。却說殊勝淨德二

后。陡生毒計。將銀買囑生婆。普滿若生太子。可將貓兒剝皮。金盆洗浴。換出普滿果生太子。生婆將貓換出。二后令人送入深山。虎狼食噉。次日令人去看。只見野鳥啣花遮體。麋鹿將乳哺身。二后聞之。使人抱回。卽將白綾絞之。身無損壞。又向高樓拋下。面不改容。復送後園草內。惡牛吞入腹中。時帝避暑回朝。正宮二宮同奏三宮之事。卽時貶入冷宮。且說惡牛生下一犢。遍身五色花紋。角似金粧。蹄如銀裹。卽時臣奏王知。王見愛之如寶。題名金牛。項掛金牌。封爲引駕將軍。宮內遊行無禁。一日撞入冷宮。子母相見。二后又生毒計。假粧一病。買囑醫生。用金牛心合藥。醫生具奏於王。王准其奏。宣令旃陀羅領牛宰之。屠兒領回綁宰。金牛口吐人言。將二后謀害之事。細說一遍。屠兒心生慈憫。令牛遠走他邦。將家犬取心進之。忽然想起十分煩惱。有僧來至門首。問長者。因甚煩惱。旃陀羅將放牛宰犬之事。說之一遍。僧曰不妨。我寺中有一牛皮。身毛五彩。金角銀蹄。取來相送。我將袈娑鉢盂錫杖。放在此間。屠兒至夜。取燈照之。只見牛皮蹄角現存。心生歡喜。朝中來取皮毛。卽將此物獻之。又說金牛逃命。路逢太白金星。卽付靈丹一粒。

與牛吞入腹中。令投三昧水中洗浴。忽爾頭角皮毛四蹄俱以脫下。改頭換面。儼是一朝帝王之相。走至金輪國內。有第三公主。五鳳樓上。拋綵毬以招駙馬。因緣相遇。毬中太子之身。卽時富貴雙全。金輪國內爲尊。想起父母。啓奏國王。王備人馬珍寶。送公主同還本國。見了父王。具奏前事。父王聽奏。心中大怒。聖旨將二后并生婆醫人等。送獄定罪。迎出普滿皇后。立爲正宮。太子啓奏父王。兒以夙業。遭此禍殃。今幸母子重逢。不念舊時之惡。願將前犯俱赦。冤家從此解矣。猶圓覺云。觀彼冤家。如已父母之謂乎。舉此一則公案。勸人莫使謀心。正是善惡到頭終有報。只爭來早與來遲。

無極聖祖來托化

化現目連嘆人心

無極聖祖來托化

化現清提勸衆生

本傳云。目連尊者。如來弟子。父親早喪。老母在堂。守父服滿。意欲爲商。遂稟母曰。父遺三千貫文。今可均爲三分。將一分供養老母。將一分與母齋僧。將一分與兒生理。清提依兒所說。從兒去後。也不燒香念佛。也不布施齋僧。專行十惡。不修片善。目連生意。利增三倍。一日回家。得知前事。目連曰。兒聞母親作惡甚

重。清提見說。卽發願曰。母若開齋破戒。不過七日。死墮地獄。目連曰。等閒無事。休發願。自發弘願。自承當。七日已後。三曹奏准。追入幽冥。孟蘭盆經云。目連以道眼故。觀母生餓鬼中。以鉢盛飯。往餉其母。母見鉢。飯食之。卽時化爲猛火。目連悲泣。馳還白佛。佛言。汝母罪過深重。非汝一人能救。吾說救濟之方。於七月十五日。爲七世父母。及現在雙親。具五果百味之飯。請十方有德之僧。汲灌盆器。以食著中。供養十方僧衆。禮拜諸佛。洪名緣此功德。現在父母康泰。過去宗祖超昇。目連如佛所說。卽做孟蘭盆會。追薦亡母。生天。衆生不知有地獄苦。故曰。化現清提。勸衆生。

無極聖祖來托化

雪山叅道引衆生

上言無極化現度衆生。經旨一品二科。竟偈曰。

法身寥廓本無生

爲度機緣降梵宮

遊翫四門觀假相

巢棲六載悟真空

慈雲普覆三千界

法雨周流萬國中

直指含靈真面目

愚蒙遮障不能通

化賢人勸衆生。品第六

此經一品。主意一科。舉古勸今也。此與前品大同小異。無極化現雖一。東西國土不同。前品舉他國聖人。

行出世之法。引導善信。此品舉我國賢人行世間之法。勸化衆生。祖見世人。知恩者少。負義者多。故立此品示之。化賢人勸衆生。無極化現賢孝之人。普勸一切忤逆衆生。令彼見賢思齊。做好人行好事。現在香名遠播。過去離苦生天。世出世間之法。此二品盡之矣。道清禪師云。欲修佛道。先修人道。人道不修。佛道遠矣。品題解竟。偈曰。

持齋念佛孝雙親

報答雙親養育恩

一念十方同薦拔

四生六道盡超昇

先亡宗祖生天界

現在椿萱福壽增

若肯始終行大孝

天生貴子受皇恩

自爲大地衆生。無有孝親之心。背恩忘義。化現賢人勸化衆生。

此品大義。舉古賢孝之士。勸今愚魯之人。自爲大地衆生者。聖賢出世。非圖利己。衆生不能行孝。無極化現賢人。勸化衆生。孝順父母。善事父母。曰孝。能行仁義。曰賢。孝者五倫之首。百行之原。爲人不孝。如木無本。似水無原。雖欲茂盛流通。不可得矣。佛祖慈悲。隨類現形。觀根設教。化現賢人。勸化衆生。經云。衆生無邊誓願度。前文已竟。偈曰。

無極祖來托化孟姜賢女。哭長城十萬里勸化衆生。此偈重頌上文。共引十箇古人。皆舉古勸今意耳。孟姜傳云。秦始皇時。弘州弘水縣。有許員外。女名孟姜。三姓合名。自幼行孝。故名賢女。天賜秀才范杞良。成婚三日。被鄰訐露。令築長城。至冬。天寒。姜女心懷節義。千里賫送寒衣。尋問范郎。商人告曰。范郎已築長城之內。姜女聽說。悶絕躡地。良久方甦。沿城大哭。城崩。露出屍骸。滴血尋夫歸葬。我祖觀此賢女。能全夫婦之情。品前舉此。先勸今時女子。各要敬重丈夫。合四德三從之道。盡夫唱婦隨之理也。

無極祖來托化高釵賢女。擢大海去尋爺勸化衆生。勸善書云。秦高文簡。有女名高釵。簡奉勅命往海東。採取靈芝。遭風溺海。骸骨未歸。其母追思悲泣。女問曰。母親爲何悲淚。母曰。汝父身溺海中。不得歸塋。祭掃。釵女聽說。擢海尋爺。三日三夜。分毫不減。孝心感動天庭。太白金星。賜降水罐。北斗杓。不過一時。海枯見底。龍王分付龍兵。卽獻海中骸骨。孝女滴血認之。得父骸骨歸葬。報父生身之恩。引此天生賢女。勸化不孝衆生。凡爲人子者。都要孝順父母。頌曰。無極慈悲化女身。尋爺擢海動天庭。名揚四海輝今古。畱與

經中勸世人。

無極祖來托化焦花賢女

數九天哭燎麥勸化衆生

焦花傳云。宋焦花女。因婆有病。左右不離。問曰。婆心想吃何物。婆曰。只聞新麥湯香。賢女聽說。半晌無言。告婆婆曰。數九天寒。焉有新麥。只得密祝天地。守着麥秧。哭了三日三夜。孝心感動天庭。秀出麥穗叢叢。取回煎湯食之。卽時病得痊愈。舉此勸爲媳婦者。都要孝順公婆。古德云。孝心就是佛心。皇天不負孝人。無極祖來托化黃氏賢女。臨命終。離別哭勸化衆生。黃氏卷云。宋曹州南華縣。賢女黃氏。一生受持金剛經。夫趙令方。宰猪爲業。妻勸回心。生一男二女。臨命終時。離別痛哭。叮嚀丈夫兒女。不要開齋破戒。黃氏雖是女子。到有丈夫之志。正是先度自家親眷。後來再度世間人。

無極祖來托化賢德聖女

看家狗打死了勸化衆生

七寶故事云。宋孫榮孫華。同母兄弟。榮好朋友樂酒。無度。華好讀書。清謹見稱。榮與友人胡子川。柳隆卿。三人結義。曰。雖水火不可棄。急難不可離。飲宴不分。日夜。弟華苦諫。遭笞。趕在窰舍讀書。榮妻諫曰。骨肉逐居窰舍。鄉人請醉高堂。榮不聽。妻設計。一日將犬

殺死以衣着之。掛在後門。榮外醉歸。妻曰家中變事。將如之何。榮大驚駭。走告胡柳二人。推事不赴解救。榮自嘆曰。酒肉弟兄。千箇有。急難之中。一箇無。榮往窰舍告弟。弟回將狗埋藏。榮心悔悟。兄弟如初。胡柳具告到官。榮妻將情訴出。郡守奏聞於朝。旌表其門。封爲賢德聖女。時人語曰。殺狗勸良人。臨危見假真。朋友交何益。弟兄還是親。舉此以戒世人。勿疎手足而厚他人也。古云。骨肉貧者莫疎。他人富者莫厚。我祖觀此非凡。必是天生聖女也。

無極祖來托化編筓接棗

無極祖來托化鋸樹畱隣

勸善書云。宋張仁李義二人爲鄰。李公園有棗樹。枝

垂張宅院中。孩兒採取食之。張公曰。爲此小食。後傷大義。卽時編筓接棗。李公不容。張公欲移他宅。李公鋸樹畱隣。又金壁云。前漢王吉。事宣帝爲諫議時居長安東

家有棗樹。垂吉庭中。吉婦取而啖之。吉知。乃要去婦。東家聞之。欲伐其樹。隣里共止之。因請吉還婦。鄉里爲之諺云。東家伐樹。王吉去婦。東家棗完。去婦復還。

王吉義也。東家仁也。所謂無好人者。豈非自棄乎。舉

此以勸世人。隣里須當和睦。不可互相是非。

無極聖祖來托化

化現孟宗勸衆生

大明仁孝皇后。勸善書云。吳孟宗。性至孝。老母病篤。冬月思笋煮羹。宗無計可施。乃往竹中。攀竹而泣。孝感天地。須臾地裂。出笋數莖。持歸作羹奉母。食畢病愈。人皆以爲至孝所感。詠史詩云。孟宗泣竹笋冬生。豈是青青竹有情。影響主張非別物。人心但莫負幽冥。

無極聖祖來托化

化現郭巨勸衆生

勸善書云。漢郭巨。事親至孝。遇歲饑荒。有子三歲。母常減食與之。巨謂妻曰。貧乏不能供母。子又分母之食。子可再有。母不再得。其汝埋子可乎。遂同掘坑。三尺得黃金一釜。上云。天賜黃金。郭巨孝子。官不得奪。民不得取。日記詩云。郭巨思供給。埋兒願母存。黃金天所賜。光彩照寒門。

無極聖祖來托化

化現袁小勸衆生

孝德傳云。昔有袁小。年方十歲。見父逆祖。常諫其父。一日父因祖病。將筓送父歸山。小不見祖。問父。父曰。冤家老病。送入深山。喂虎。袁小聞說。啼哭入山。尋覓見祖。抱頭而哭。年小無力扶祖。先拖筓回。父曰。拖筓來家。怎麼。兒曰。父老一般歸送。父聞此說。卽時入山。扶回。慇懃奉養。頌曰。袁小拖筓勸父親。父親縱逆也。

回心奉勸人間不孝子。莫學愚頑錯用心。

無極聖祖來托化。

化現王祥勸衆生。

日記云。晉王祥早喪母。繼母朱氏不慈。祥愈恭敬。母疾。思食鮮魚。時天寒冰凍。祥解衣臥冰求之。冰忽自解。雙鯉躍出。持歸奉母。母即痊愈。後仕位至三公。詩曰。繼母人間有。王祥天下無。至今河水上。一片臥冰模。此上十則。總是舉古勸今。勉人要盡人倫之大。當以孝行為先。古德云。先能了達世間事。然後方言出世間。上言化賢人勸衆生。經旨一品已竟。偈曰。

孟宗泣竹救尊堂。

高釵尋爺返故鄉。

焦花哭麥香名遠。

袁小拖箆孝行長。

送衣姜女心如鐵。

鋸樹畱隣義似霜。

郭巨埋兒天賜寶。

黃氏看經建道場。

飲酒退道殺生品第七

此經一品主意一科。禁止飲殺也。祖見行人先聞般若。若皈依三寶。後長無明。捨退道心。故立此品示之。飲酒退道殺生者。愚人飲酒。即退道心。道心既退。不顧修行。所以廣殺生命。窮極肥甘。地獄輪迴。由斯不息。如來慈悲說戒。救護一切衆生。以殺盜淫妄酒五戒為根本。今此品題存二攝三梵網經第一殺戒佛言。

佛子。若自殺。教人殺。方便殺。讚嘆殺。見殺隨喜。乃至
呪殺。殺因。殺緣。殺法。殺業。迺至一切有命者。不得故
殺。是菩薩應起常住慈悲心。孝順心。方便救護一切
衆生。而反恣心快意殺生者。是菩薩波羅夷罪。此云。
棄罪。永棄佛法邊外。如大海不受死屍。裴相國云。血
氣之屬。必有知。凡有知者。必同體。故經云。爲利殺衆
生。以財網諸肉。二俱是惡業。死墮號叫獄。第五酤酒
戒。若佛子。自酤酒。教人酤酒。酤酒因。酤酒緣。酤酒法。
酤酒業。一切酒。不得酤。是酒起罪因緣。而菩薩應生
一切衆生明達之慧。而反更生一切衆生顛倒之心
者。是菩薩波羅夷罪。范魯公戒酒詩云。戒爾勿好酒
狂藥非佳味。能移謹厚性。化爲凶險類。古今傾敗者。
歷歷皆可記。退道二字。內攝盜姪妄三戒。故曰。飲酒
退道殺生。品題解竟。偈曰。

酒爲狂藥壞良能

喪命傾家衆禍根

李白貪杯亡幻體

淵明罷飲養天真

世人好飲人心亂

僧道貪杯道念昏

覷破無明三十六

陰司地獄放光明

金剛科儀云。衆生殺生害命。造下罪業。過於泰山。深似
大海。造下無量無邊罪業。死到陰司地府。受五百劫苦。

不得翻身。受盡五百劫苦。又轉四生六道。受苦無盡。

此引序分。宗教雙拈。勸勉衆生。禁止飲酒殺生。免遭地獄之苦也。古德云。仁者好生。不仁者好殺。好生者。天祐之。人愛之。好殺者。天怒之。人惡之。慈氏頌曰。刀割衆生身上肉。自家面上要添肥。與你黃金千萬兩。誰肯將刀割白皮。五百劫解前五品。偈曰。

喫酒喫肉真是苦

久後受苦好恹惶

退了道心真是苦

久後受苦好恹惶

殺生害命真是苦

久後受苦好恹惶

爭名奪利真是苦

久後受苦好恹惶

不肯回心真是苦

久後受苦好恹惶

毀謗正法真是苦

久後受苦好恹惶

此頌飲酒退道殺生有苦也。頌曰。飲酒食肉退道心。殺生害命與爭名。不肯回心謗正法。陰司地獄不饒人。佛說五戒。以酒爲終。祖言退道。以酒爲始。酒是起罪因緣。昔儀狄造酒。禹飲而甘之。曰。後世必有以酒亡其國者。遂疎儀狄。而惡旨酒。毗婆沙論云。昔有鄒波索迦。持戒最精。一時爲渴所逼。見器有酒如水。遂飲以犯酒戒。隣雞入舍。盜殺而噉。隣女尋雞。強逼交通。隣家告理。俱諱犯誑。五戒之破。皆因酒起。佛告

比丘汝等除飲。自今已後。點酒難犯。優曇曰。酒是迷魂。懵憧湯。惺惺喫了也。顛狂可憐。口念彌陀者。含血來噴。大法王。上頌現在之因。下頌未來之果。

閻王推上刀山獄

望鄉臺上好恓惶

牛頭惡鬼勾取你

陰司路上好恓惶

閻王者。掌管人間善惡。絲毫不受人情。卽鬼王也。牛頭者。獄卒也。刀山者。阿含云。大地獄中。別有十八刀山地獄。一一刀山高五百由旬。盡以刀刃向上。各高三三尺。有大羅刹。驅諸罪人。盡登此山。割截脚足。苦不可忍。以前世時。於山野中。羅網弓箭。殺害衆生。貪食其肉。故報此罪。望鄉臺者。罪人上此臺。見家中六親眷屬。披麻帶孝。心中苦痛。恩愛不斷。故曰好恓惶。惡鬼者。阿含曰。牛頭惡鬼。見此受苦衆生。惟恐不毒。或問。何以無慈。牛頭曰。此獄受苦衆生。生前不孝父母。不敬三寶。造十惡業。以罪畢日。我加勸諭。此獄極苦。難以忍受。汝今得出。無復更造。出獄俄頃。而又復來。令我勦力疲倦。從劫至劫。與其相對。以是事故。我與罪人。無有慈心也。宗鏡云。鬼王獄卒。一任欺凌。劔樹刀山。更無推抵。故曰。陰司路上好恓惶。

閻王推上黑暗獄

剜眼地獄好恓惶

黑暗地獄。卽鐵圍山也。因本經云。佛告諸比丘。於四大洲。八萬小洲。諸餘大山。須彌之外。第九小鐵圍山。圍一世界。高齊夜摩。大梵覆頂。包大鹹水海。金剛所成。難以破壞。此鐵圍外。復有一重大鐵圍山。高亦如是。兩山之間。極大黑闇。無有光明日月。八大地獄。盡在其中。衆生瞞心昧已。使黑闇心。不依戒律。毀大乘經。故招此苦。阿含云。日月星光不能照。諸大地獄在其中。剗眼地獄。黑暗不見光明故也。法界圖云。須彌圍山。夜摩齊。小千圍山。初禪齊。中鐵圍齊。二禪頂。大千鐵圍。三禪齊。

閻王推上滾鍋獄

油鐸地獄好恹惶

油鐸。卽滾鍋也。爲人在世。活煮鱉鱔等類。死入陰司。依因感果也。

閻王推上阿鼻獄

奈河地獄好恹惶

因本經云。八大地獄。第八名阿毗。至大地獄。又名阿鼻。此云無間。東西南北。四維上下。各大火聚。罪人擲中。受大苦惱。無有間斷也。活等七獄。各壽千歲。阿毗獄王。壽二萬歲。法苑偈曰。人間六十小劫終。獄中方當一晝夜。奈河地獄。經云。衆生生前。五逆十惡。謗大乘經。死墮阿毗。罪畢。復入寒水奈河地獄。受無量苦。

罪畢。又入畜生道。畜生罪畢。方生人中。盲聾瘖瘂。貧窮下賤。日連卷云。尊者尋母。到奈河橋邊。只見金橋一座。打掃潔淨。行善之人。金橋而過。作惡之人。盡入河內。河深萬丈。浪滾千重。銅蛇繞項。鐵狗吞身。尊者問曰。生作何罪。今受此苦。獄主答曰。此人在世。不孝父母。死入陰司。故獲此報。偈曰。奈河千尺浪。苦海萬重波。欲免輪迴苦。及早念彌陀。

地獄受苦無邊際

四生受苦好恓惶

此結惡道苦趣。地獄罪畢。又入畜生。披毛戴角。銜鐵負鞍。以肉供人。用命還債。好恓惶者。生被刀砧之苦。活遭湯火之災。不言餓鬼者。省文耳。衆生退道。招此惡報。因果分明。不可逃也。上言飲酒退道殺生。經旨一品已竟。偈曰。

退道行凶是惡芽

泥犁苦趣當爲家

爐炭鐵丸烟鬣隼

鑊湯銅汁浪翻花

一靈杳杳棲冥府

百骨紛紛伴土沙

此事不從天地有

只因自己念頭差

蓋古人錯答一字。品第八

此經一品主意一科。舉古勉今也。祖見行人未達利生之旨。反招害已之殃。故立此經示之。蓋者。文之起

端。古人錯答一字。指前百尺。自己宗眼未明。錯答學人一字。若明這一字。堪作人天師。不明這一字。難免野狐身。古人錯答一字。尚墮野狐。今人謬誦此經。應入地獄。雖然如是。具眼難瞞。這裡轉得過。何曾墮野狐。會者將牛作馬。不為分外。迷者騎牛覓牛。也是徒然。品題解竟。偈曰。

宗鏡科儀一句文

引為題目利諸人

蓋字義中休住脚

古人句裏莫畱神

錯中消息原非正

一上玄微始是真

諸上善人如會得

塵塵剎剎放光明

金剛科儀云。蓋古人錯答一字。尚墮野狐。

此出流通分。舉古人之公案。勉今人以明心。舉百丈上堂。常有一老人聽法。隨眾散去。一日不去。丈問立者何人。老人曰。某甲於過去迦葉佛時。曾住此山。有學人問。大脩行底人。還落因果也無。某甲對他道。不落因果。墮野狐身。五百生。今請和尚代一轉語。丈曰。不昧因果。老人於言下大悟。天童頌曰。一尺水。一丈波。虛詐不實五百生前沒奈何。因妄感報不落不昧。商量也。依前撞入葛藤窠。萬松云。據實而論。不落因果。是撥無斷見。不昧因果。是隨流得妙。稍解教乘者。舉着便見。要且雖脫毛衣。猶披鱗甲。不見道。圓禪師在南禪師會中。聞二僧舉此話。一僧曰。只如不

昧因果也未脫得野狐身。一僧應聲曰。便是不落因果。亦何曾墮野狐身耶。師悚然。忽大悟。見南公作偈曰。不落不昧。僧俗本無忌諱。丈夫氣宇如王。爭受囊藏被蓋。一條柳絮任縱橫。野狐跳入金毛隊。南公大笑。萬松云。二僧總有超群之辯。呵呵會也麼。上句檢點將來。未免撞入葛藤窠裏。

人悟處。露自己胸襟。下句試問諸人。這笑是不落。是不昧。這裏會得。不住二邊。若是你灑灑落落。不妨我哆哆和和。此二句。不在落昧生情卜度。和。嬰兒言語。不真貌。此喻離。神歌社舞自成曲。

分別取捨。落昧總皆自在。言前妙旨。不但須處是顯理。縱遇拍手其間唱哩囉。正是不自在時。真自在。不風流處儘風流。世諦語言皆合道。誰家絃管不傳心。

案下勉今人明心

這一字海水為墨。須彌山為筆。寫不着這箇字。

祖見行人。滯在落昧上。商量不明。向上本有這一字。

大慈大悲。分明泄漏。這一字者。不是世間文字。縱有

山筆海墨。不能寫這一字。勉人向外知歸。切莫言中

取會。華嚴云。一字法門。山筆海墨。書不能盡。

五千四十八卷。三教經書。從一字流出。

此明山筆海墨。寫不着這一字。這一字者。心之異名。

未有三教經書。先有這一字。三教經書。皆由心造。故

曰。從一字流出。

諸佛名號。諸菩薩名號。從一字流出。一切人名字。萬物的名號。從一字流出。妙法不妙法。好法惡法。從一字流

出一切萬法。從一字流出。

此明一字之妙。出生萬有形名。古人認得這一字。不墮野狐五百生。今人認得這一字。千變萬化妙無窮。諸佛菩薩出世。都只爲這一字。祖師出世一番也。只爲這一字。這一字。流出諸佛名號。及一切萬法。金剛經云。一切諸佛。及諸佛阿耨多羅三藐三菩提法。皆從此經出。如人靜坐。一念不生。諸佛菩薩。本來空寂。心中纔舉一念。稱南無阿彌陀佛。南無本師釋迦牟尼佛。南無大悲觀世音菩薩。南無大勢至菩薩。諸佛菩薩名號。皆從一心所發。故曰。從一字流出。就是世間一切人之名字。萬物所有之名號。皆從一心所發也。妙法。卽諸佛菩薩名號。惡法。如五逆十惡等事。妙法既從一字流出。惡法亦復如是。若人認得這一字。轉愚痴爲智慧。處煩惱卽菩提。攬長河爲酥酪。變大地作黃金。參學至此。三界唯心。故總結云。一切萬法。從一字流出。

此字就是此經。此經就是此字。此經就是本來面目。本來面目就是此經。此經就是寶塔。寶塔就是此經。此經就是家鄉。家鄉就是此經。此經就是西方。西方就是此經。此經就是佛國。佛國就是此經。

此十二句。反復可嚀。分明指示。發明本有真經。不可向外尋覓也。此字就是此經。此這一字。流出五千四十八卷故也。此經就是此字。三教經書。皆從此這一字流出。此經就是本來面目。此經非紙墨文字。故直指云。本來面目。就是此經。要人直下承當。不可當面錯過。寶塔家鄉。西方佛國。都不出此一卷真經。此經無相。包裹大千。不可妄生分別。華嚴經云。如有大經卷。量等三千界。在一微塵中。一切塵亦然。有一聰慧人。淨眼悉能見。破塵出經卷。廣饒益衆生。○如大經卷。行人心量廣大。就與大千無二。在一微塵中。小中含大。塵塵皆然。有一聰慧人。了悟之士。背塵合覺。自利利他。故曰。廣饒益衆生。

錯答這一字。尚墮野狐。謬誦此經。應入地獄。

我祖將這一字說明。引此以爲結語。古人錯答一字。尚且難免野狐。今人謬誦此經。如何可逃地獄。且道深識文字。有師印證。如何謬誦不見道。差之毫厘。失之千里。

料儀云。若乃循行數墨。轉益見知。宗眼不明。非爲究竟。此出序分之前。證上謬誦之人。若不句句消歸自己。只管循行數墨。轉增多見多知。心宗未徹。智眼不明。

如人數他寶。自無半錢分。不是涅槃極果之法。故曰
非爲究竟。

若人具上根上智。不撥自轉。是胸中自有此經。且將置
三十二分於空閑無用之地。亦不是過。如或未然。且聽
山埜與汝打葛藤去也。夫金剛者。自性堅固。萬劫不壞。
况金性堅剛也。般若者。智慧也。波羅蜜者。登彼岸義也。
見性得度。卽登彼岸。

此引序分之四。証明本有真經。人人具足。下根不明
者。聽我爲汝打葛藤也。破邪二十品。解明見性得度
登彼岸。參學功成。宗眼明。

未得度者。卽是此岸。不得出苦。永不還原。

後二句宗旨。直釋此岸有苦。偈曰。

此經佛說數千年。

無量人天得受傳。

憶得古人曾解道。

更湏會取未聞前。

此引序分之三。頌上此經一字。此經者。非指文字語
言。乃是實相般若之心。卽前這一字也。又云。前二句
依經解義。佛說此經已來。至 [宋]建隆一千九百四
十餘年。至

[大明]正德二千四百八十餘年。迄今

崇禎二千六百餘年。故曰數千年。頌曰。釋迦滅至

崇禎元二千五百七十七佛先說經三十載二千六百零七年此經受持相傳者多。或人或天。而有無量無邊之數也。宗鏡曰。流通天上人間。普遍微塵刹海。後二句。顯衲子家風。得受傳妙法。宗鏡云。這一卷經。六道含靈。一切性中。皆悉具足。要人聲前領旨。故曰。會取未聞前。且道未聞已前。如何會取。嗚。卽是自己未曾舉心動念之時。他人未曾搖唇動舌之處。這裡會得。一切萬法。從一字流出。經云。於一毛端。現寶王刹。坐微塵裏。轉大法輪。處處是彌勒樓閣。在在是普賢行門。如或未會。諦聽後偈。

未曾開口先有此

未曾初分經在前

真經本性就是此

此經終日放光明

此頌自性真經。未曾開口。本來具足。未曾初分。先足現成。如是會得。真經是本性。本性是真經。終日放光明。古今無斷滅。

不生不滅。是此經

不增不減。經現成

不垢不淨。無修證

未曾初分。經現成

此按心經而頌。這一卷無字真經。人人本有。個個不無。天地未分。此經已具。故曰。未曾初分。經現成。

心經本來無修證

心是佛來佛是經

一切萬物心變化

譬撥攬草是此經

佛說般若心經。發明本有實相。原無修證。明上不生。不滅現成也。心是佛來。佛是經。是心是佛。是心是經。不可離心。別覓經佛。三句言心之妙用。正頌一切萬法。從一字流出。譬撥攬草。是此經。信手拈來。真經顯現。通身手眼。總是真經。上言古人錯答一字。經旨一品已竟。偈曰

一卷真經更不差

諸人識得便歸家

十二部經舟到岸

五千餘卷浪淘沙

迷真逐妄言言錯

見性明心句句達

透過這些關捩子

寒林常放不萌花

執相修行落頑空品第九

此經一品主意一科。破妄明真也。行人滯事昧理。故立此品示之。執相修行者。執着一切有為色相。當作修行大事。不明無為實相。難免三界昇沉。故曰落頑空。頑空者。不明靈覺真空。難免輪迴生死。永嘉云。覺即了。不施功。一切有為法不同。住相布施。生天福。猶如仰箭射虛空。勢力盡。箭還墜。招得來生。不如意。爭似無為實相門。一超直入如來地。品題解竟。偈曰

真性如空空不空
恒沙諸佛體皆同

執心執性行邪道

隨色隨聲失正宗

取相求玄全是妄

迷頭認影總非功

但能不執纖毫法

放去收來處處通

心經云。空卽是色。色卽是空。

此經題曰般若波羅蜜多心經。佛與舍利子談。內含破相明空之義。此經通行於世。我祖引以示人。此二句。證品題執相修行落頑空。破妄明真之義也。

一切有相。都是色相。執着色相修行。臨危散了色相。勞而無功。撲了頑空。空卽是色。地水火風到。臨危四大散了。無處安身。立命撲了頑空。色卽是空。

前引教以證品題。此以宗而判教義。迷人執着一切色相修行。逐妄迷真。雖有人天福報。難免地獄輪迴。久後受苦。勞而無功。撲了頑空。撲猶落也。果落頑空者。因執色相也。故曰。空卽是色。地水火風名曰四大。迷人心中取法。不知自己安身。因中執色相。果上落頑空。故曰。色卽是空。

執着色相。撲了頑空。到臨危。無處安身立命。

此結品題。執相修行落頑空。故曰。無處安身立命。

科儀云。無始無明幻色迷。夢魂生死幾千回。

此出序分。引證執相迷心之人。非獨今生如此。無始

者遠劫莫知其始。無明者無有般若之明。從無始已來。被色所迷。皆因無明而流轉也。故知無明爲八萬塵勞之根。作十二因緣之首。河沙煩惱。由此而生。塵劫輪迴。因之不絕。生來死去。如夢一般。故曰。夢魂生死幾千回。

金剛經云。凡所有相。皆是虛妄。

此引金剛五分。證上執相落空。虛者不實。妄者不真。一切有相。總非真實也。

執着色相修行。迷了自己。永轉輪迴。不得翻身。

此結執相迷空。難免輪迴之苦。勉人早悟法身非相。求證金剛不壞之身。偈曰。

執銅鐵是頑空空卽是色 執銅鐵是頑空色卽是空

此偈至下。重頌上文。破妄明真也。銅鐵是頑空者。卽禪師云。金佛不度爐。木佛不度火。泥佛不度水。頌曰。三佛形儀總不真。眼中瞳子面前人。若能信得家中寶。啼鳥山花一樣春。

執念頭是虛氣無有歸落 到臨危四大散那裏安身
執念經循行墨無有歸落 到臨危四大散那裏安身
苦修行不得你安身立命 到臨危無投奔那裏安身
此頌執着色相修行。臨危散了色相。無處安身立命。

故曰到臨危無投奔那裏安身。

有相佛引迷人不是真相。無相佛是真佛永劫常存。
有相佛不是佛虛花境界。無相佛是真佛掌立乾坤。
此辯有無真妄發明自性天真佛也。傳大士云如來
舉身相爲順世間情恐人生間斷權且立虛名假言
三十二八十也空聲有身非覺體無相乃真形優曇
又云一尊古佛天來大四色花池海樣寬自是衆生
無眼力豈知不隔一毫端。

你念的色相佛泥土假像。我念的無極佛普覆十方。
你念的是銅鐵木頭假像。我念的無極佛執掌乾坤。

祖師以已較人所念真妄不同。川老云泥塑木雕兼
彩畫堆青抹綠更粧金。若言此是如來相笑殺南無
觀世音。○舉丹霞禪師宿慧林寺大寒乃取木佛焚
之。院主訶責師曰我燒取舍利。主曰木頭何有。師曰
旣無舍利再燒兩尊。丹霞明無相真佛。我祖明無極
真身。二老同一鼻孔矣。

你念的過去心生死大路。我念的三千佛一體同觀。
上句言迷人念佛希圖來生受福。故曰生死大路下
句指自性彌陀三世諸佛不二。故曰一體同觀。傳大
士云夜夜抱佛眠朝朝還共起。永嘉云非但我今獨

達了。恒沙諸佛體皆同。上六句。以已較人竟。下四句。獨顯已悟也。

我念的無極佛安身立命。我念的諸佛境普覆身中。
我念的掌教佛諸佛聚會。我念的大千界一體真身。
此頌發明自性。就是無極真身。三世諸佛同一鼻孔。
卽安身立命之要訣也。永嘉云。諸佛法身入我性。我
性同共如來合。故曰一體真身。

大千界天和地無極執掌。我念的無極原一體真身。
此下以已示人。發明自性與無極一體無二也。三千
大千世界。有萬億須彌日月。有萬億四天下。如此世
界之多。總是無極執掌。法華云。十方諸國土。無刹不
現身。上言天地無極執掌。下言萬物自無極生。

天和地森羅象無極神力。我念的無極原一體真身。
日月轉天河轉無極神力。我念的無極原一體真身。
五湖海大洋江無極變化。我念的無極原一體真身。
發春秋和四季無極變化。我念的無極原一體真身。
五穀糧四季田無極現化。我念的無極原一體真身。
草木樹諸花果無極現化。我念的無極原一體真身。
掌教的三千佛無極現化。我念的無極原一體真身。
男和女臭皮囊無極現化。我念的無極原一體真身。

天地以至男女皆自無極變化發明本來面目就是無極原身。祖觀無極乃太極天地之根。天地乃一切萬物之母。蓋以混沌未分太極未判未有天地安有萬物。自開天闢地以來萬物生主而變化無窮。若飛若潛若動若植若洪若纖若高若下有情無情正報依報孰非天地之生成無極之變化也。我祖知根達本究竟原初故曰我念的無極原一體真身。圓覺卷云萬物靈光無極生立天立地立人根未定五行及八卦無秋無夏亦無春。

口不動舌不動終日舉念。行與住坐與臥靠定真空。

上言我念無極真身此正說箇念的樣子。口舌不動如何舉念不見道。行住坐臥不離這箇。明了這箇故曰靠定真空。且道真空無相作麼生靠靠定卽是不離真空就是無極。學人洞明無極纔是終日舉念也。說話人是真空裏外一體。主人公是真身本體虛空。上言靠定真空此正說個真空模樣。人人說話當人本無形相名曰真空裏外玲瓏故說一體自己主人公本來無生滅此是真法身。亘古無踪跡故曰本體虛空。

十方空不是空諸佛本體。十方空不是空無極法身。

本來面是無極原無二氣。到臨危無二氣一體無身。前二句十方虛空不是頑空。卽是諸佛本體無極法身也。瑜珈云佛真法身猶若虛空。楞嚴云虛空本如來藏妙真如性。先言執相落頑空。此言破妄明真空。後二句直指本來實相。就是無極法身。不以安危而有差別也。此末後八句展轉發明真空與虛空無極本來面。名上有差殊。理中無改變。無身卽無極法身也。華嚴云佛身充滿於法界。普現一切羣生前。龐居士云凡夫不入理心緣。世上事乞錢買瓦木。蓋他虛空地。

出居士詩上證前執相落空。凡夫執有不明真空之理。攀緣浮世之事。乞化施主錢糧。蓋他空閑之地。却被六賊驅背。却真如智。終日受艱辛。妄想圖名利。如此學道人累劫終不至。

此言執相修行。背明投暗。雖經多劫工夫。難入真空妙理。故曰終不至。結前品題。執相修行落頑空。不得至。不得出苦海。永在沉淪。不得翻身。

此宗釋上不至。若是大力量人。不圖名利。接物利生。領人作福。不爲分外也。上言執相修行落頑空。經旨一品已竟。偈曰。

修行道者滿娑婆

不悟無生怎奈何

執相求玄魚入網

沉空守靜鳥投羅

主中立主原非佛

頭上安頭總是魔

窮到威音親切處

無修自在笑呵呵

虛空架住大千界品第十

此經一品主意一科。虛空安界也。祖見行人。只知天地能生萬物。不知虛空能生天地。故立此品示之。虛空者。無形無相。乃無極本體也。架住者。安住也。大千界。三千大千世界。總是無極虛空安住。此承前品大千界天和地無極執掌而來。學人體合虛空。大千這裏安住。所謂四十九年無別事。只教心與太虛同。曰。虛空架住大千界。品題解竟偈曰。

頓悟心空法法通

恒沙妙用體皆同

乾坤不出那伽定

日月含藏大覺中

動靜隨方彰道體

忙閑應用顯家風

果然如是知端的

絕勝僧祇萬倍功

龐居士云。無有報龐大。

此出居士詩上。引證無極。乃天地本原也。龐大者。龐公以已顯法。按後偈。指無極虛空。而為龐大也。無有報龐大。即言無極虛空。安住大千世界。化生萬物。養

育羣生無人知根報本也

空空無處坐家內空空空空無有貨

空空無處坐人空法空不住一物故曰無處坐家內
空空空過現未來三心俱不可得空空無有貨外空
萬境內空一心心境雙忘故曰無有貨

日在空裏行日沒空裏臥空坐空吟詩詩空空相和

前四句言虛空之體不立一塵此四句言虛空之用
不捨一法日在曰晝日沒曰夜托物比興有詩同聲
相應成和此言行人日夜之間動靜語默行住坐臥
全仗無極虛空行仗虛空行坐仗虛空坐能吟詩者
是虛空知音和者是虛空人之依空如魚依水不可
須臾離也

莫怪純用空空是諸佛座世人不別寶空卽是寶貨

此四句體用雙彰與人正信除疑怪疑也此一空字
卽無極虛空乃天地之本原萬物之根基諸佛之法
座衆生之本體世人愚癡只能辨別世間之寶不能
辨別出世之珍寶貨卽無極虛空古今不變用之無
窮行人得此珍寶頓除歷劫之饑虛能滅多生之罪
垢故曰空卽是寶貨

若嫌無有空自是諸佛過

此結空是實貨。佛佛授受無差。愚人嫌疑不信。此空非是我之妄語。乃是諸佛之過咎也。

若是誑語。卽是千佛過。

此宗釋教。申明諸佛真言。更無虛誑。永嘉云。若將妄語誑衆生。自招拔舌塵沙劫。

華嚴經第五十卷云。如依虛空起四風輪。

此文嘆序解明。彼廣純教。此略兼宗。證品題虛空架住大千界也。無極虛空顯大神通。起四風輪而持水輪。何等爲四。

一風輪安住。二風輪常住。三風輪究竟住。四風輪堅固住。

大鈔疏云。一時持水名安住。多時持水名常住。與劫齊量名究竟。體性不壞名堅固。此四風輪能持水輪。水輪能持大地。令不散壞。

上言風輪之上有水輪。此言水輪之上有地輪。故曰水輪能持大地。令不散壞。

不是無極佛架住地。散了地那裏住。

此宗釋教。申明無極古佛架住大千世界。是故說地輪依水輪。水輪依風輪。風輪依虛空。

此復以教明宗。言地輪水輪風輪。皆依無極虛空而

安住也。

虛空無所依。雖無所依。能令三千大千世界。而得安住。品題虛空架住大千界。正謂此也。

佛子。如來出現。亦復如是。

本經是普賢昭告文殊。及諸菩薩。故曰佛子。如來十號之一也。此是以法合喻。虛空起四風輪。安住大千世界。令不散壞。喻如來出現於世。依無礙慧光明起。佛四種大智風輪。能持一切衆生善根。令不退轉。故曰亦復如是。本經以喻顯法。此引借喻明題。

無極架住大千界。

無極卽虛空也。結前品題。虛空架住大千界。偈曰。

不知大千誰人掌

都是忘恩背祖人

不知天地誰人托

都是忘恩背祖人

不知日月誰運行

都是忘恩背祖人

不知江海誰人治

都是忘恩背祖人

不知春秋誰人發

都是忘恩背祖人

不知五穀誰人治

都是忘恩背祖人

不知萬物誰人治

都是忘恩背祖人

此頌無極虛空。架住大千世界。衆生處於大千之內。天地之中。只知日月運行。春秋往復。五穀生生不息。

萬物變化無窮。不知是誰執掌安排。是誰運行調理。如此不知。卽是昧了無極根基。故曰。都是忘恩背祖人。上頌不知天地本原。下頌直指無極。乃天地萬物本原也。

不是無極神通大

大千世界那裏來

不是無極神通大

天地日月那裏來

不是無極神通大

五湖四海那裏來

不是無極神通大

春秋四季那裏來

不是無極神通大

吃的萬物那裏來

不是無極神通大

金銀財寶那裏來

不是無極神通大

三災八難那裏來

不是無極神通大

三教聖人那裏來

不是無極神通大

三教經書那裏來

不是無極神通大

一切男女那裏來

不是無極神通大

一切牛馬那裏來

此合上三十六句。有捏聚放開之義。縱奪殺活之機。此二十二句。直指無極神通。生育天地。長養萬物。有情無情。正報依報。莫不由此而發生也。若非無極神通。如樹無根。枝葉花果。憑何所有。大千至牛馬。一切悉皆空。故曰。那裏來。行人洞明自己虛空。就是無極

原身同顯神通一體無二。上頌無極天地本原宗旨竟。下引圓覺復證之。

圓覺卷云

萬物靈光無極生

立天立地立人根

未定五行及八卦

無秋無夏亦無春

此卷二十四分。各指菩薩為題。始文殊表智。終普賢表行。此出勢至分第二十。引證無極乃天地本原也。萬物為用。一性為體。未有萬物。先有一性。古德云。有物先天地。無形本寂寥。能為萬象主。不逐四時凋。

科儀云

不知誰解巧安排

捏聚依前又放開

莫謂如來成斷滅

一聲還續一聲來

此引證上無極生萬物也。言不知者。反言要人知也。天地之間。四時變化。萬物發生。青黃赤白。苦辣酸甜。無數巧妙。不知是誰會安排也。古德云。捏聚也是我。裂開也是我。捏聚者。實際理地。不受一塵。如立秋一十八日。寸草結粒。立冬以後。萬物歸根也。放開者。佛事門頭。不捨一法。如三陽開泰。萬物生輝。山花似錦。野鳥談玄也。這些無邊巧妙。盡是我佛神通。故曰莫謂如來成斷滅。猶如空谷應聲。故曰。一聲還續一聲。

來。○舉世尊於涅槃會上以手摩胸告衆云。汝等善觀吾紫磨金色之身。瞻仰取足。勿令後悔。若謂吾滅度。非吾弟子。若謂吾不滅度。亦非吾弟子。時百萬億衆悉皆契悟。頌曰。雙林樹下手摩胸。說有言無總是空。若斷若常俱放下。單傳向上舊家風。

假饒造罪過山嶽

只須妙法兩三行

假饒造罪過山嶽

不須動口兩三行

此四句讚法之辭。此品單言無極虛空。架住大千世界。無極乃天地本原。萬物根基。行人會得。與諸佛同一法身。永劫常存。更無斷滅。造罪過山。如霜見日。有此殊勝功德。故曰。只須妙法兩三行。兩三行者。指法之辭。恐人逐語生解。末後拈云。不須動口兩三行。永嘉云。默時說。說是默。大地門開無壅塞。有人問我解何宗。報道摩訶般若力。上言虛空架住大千界。經旨一品已竟。偈曰。

無極虛空架大千

化生萬物體中玄

乾坤仗道如峯立

日月依空似鏡懸

大小鱗毛含太極

高低嶽瀆露先天

果然如是知端的

鼻孔原來口上邊

捨身發願度人 品第十一

此經一品主意一科立誓度人也。祖見行人遇此無極妙法不能正信除疑故立此品示之。捨身發願者諸佛因中各有通別二願。如阿彌陀佛因中為法藏比丘時有四十八願。藥師琉璃光如來本行菩薩道時有十二大願。通願者三世諸佛皆同。四弘誓願經云。眾生無邊誓願度。煩惱無盡誓願斷。法門無量誓願學。佛道無上誓願成。祖師出世一十三年苦行。夜覩白光悟道。述經五部。廣利羣生。恐人不能深信。故爾捨身發願。即我祖之別願也。度人者普度四眾。同證菩提。所謂娑婆改做蓮花國。滿佛從前發願心品。題解竟。偈曰。

祖傳正法利羣生

引教聯成不二宗

發願度人登彼岸

捨身令眾脫凡籠

重重囑付明心話

細細叮嚀見性空

直下承當休外覓

塵塵剎剎顯家風

報恩經第七卷云。善男子。善女人。知恩報恩。

此經名曰。大方便佛報恩經。七卷九品。引文出親近品第九經云。佛告阿難。若有善男子。善女人。知恩報恩。當行四事。一者親近善友。二者至心聽法。三者思惟其義。四者如說修行。善男子。善女人者。在家出家。

受持五戒之人也。既知如來恩德。當生酬報之心。且道如何酬報。依經當行四事。如佛所說。堪報佛恩。經云。復有四法。

一者隨法不隨人。二者隨義不隨字。三者隨智不隨識。四者隨了義經。不隨不了義經。

隨者。依也。涅槃六卷云。一依如來正法。不依邪人。二依如來妙義。不依文字。三依如來真智。不依妄識。四依如來了義經。不依不了義經。楞伽解了義經。十道了義。不了義經。邊見妄求。又曰。有等假充知識。專說邪宗。正是邪人。遇正法。正法說爲邪。故曰隨法不隨人。二依如來妙義。不依文字。若依文字。利生。三祇果滿。方證菩提。若依妙義明心。一言之下。卽成正覺。永嘉云。彈指圓成八萬門。刹那滅却三祇劫。故曰隨義不隨字。三依如來真智。不依妄識。智卽般若。若大智。知一切衆生。悉有佛性。識卽識神。妄見。迺輪迴種子。生死根苗。長沙云。學道之人。不識真。只爲從前認識神。故曰隨智不隨識。四依如來了義經。不依不了義經。了義經者。大乘妙法。直指實相真心。刹那見性成佛。不了義經者。聲聞小乘。究竟四諦修行。未入無餘涅槃也。

有心待要順人情。大地衆生無投奔。寧着凡身當時壞。不把妙法順人情。

我祖明上四法。結前品題。捨身發願度人也。順人情者。隨人隨字隨識隨不了。義經是也。若順人情。大地修行之人。無有投奔之處。所以捨身立誓。普度天下衆生。孔子曰。志士仁人。無求生以害仁。有殺身以成仁。前文已竟。偈曰。

有心待要順人情。大地僧俗無投奔。

有心待要順人情。吃齋受戒無投奔。

有心待要順人情。念經念佛無投奔。

有心待要順人情。禪定解脫無投奔。

有心待要順人情。神通小乘無投奔。

有心待要順人情。翻磚拜臺無投奔。

有心待要順人情。打七煉魔無投奔。

有心待要順人情。開眼許多迷路人。

此偈至下。重頌上文。祖以正法利生。不順邪人情見。若順人情。大地僧俗修行。如有目人。迷正道路。無處投奔。故此捨身發願。不順人情。永嘉云。圓頓教。勿人情。有疑不決。直須爭。不是山僧逞人我。修行恐落斷常坑。翻磚拜臺。以磚量路。禮拜五臺。或三磚五磚。七

磚九磚一拜也。打七煉魔。伏牛禪堂。一七念佛。追遣
睡魔。非不飲食。名打七也。

我順人情不打緊

一切修行無投奔

寧着凡身當時壞

不把佛法順人情

此頌不順人情。發大誓願。只要修行之人。信受如來
正法。

信心依我歸家去

不信受苦轉四生

信心無極緊擁護

不信輪迴墮沉淪

此頌信與不信罪福也。

我勸諸人休謗法

大家根基出苦輪

我勸諸人休謗法

大家根基歸去來

此頌勉人勿謗正法。俱得脫苦還原。

報恩經云。假使熱鐵輪。在我頂上旋。終不以此苦。退於
無上道。

此出報恩二卷。昔有轉輪聖王。得受婆羅門。得身燃
千燈而發願曰。卽假使四句是也。古人爲法忘軀。我
祖捨身爲法。迺古今不二法門也。永嘉云。假使鐵輪
頂上旋。定慧圓明終不失。

圓覺卷云。萬物靈光無極生。立天立地立人根。
我祖捨身發願。要人信受正法。無極者。天地日月之

本。大地男女之根。恐人不信。引教爲憑。

虛空是無極。無極是虛空。大道是無極。無極是大道。

此宗釋教。發明無極虛空大道。名三理一。依了義之經。隨智不隨識也。

本性相連太虛空。本性就是無極身。四大分張。十方世界現全身。

此是句句消歸自己。言言明見本心。直指諸人本性。與虛空無二。故曰相連。與無極爲一。故曰就是。人人無極之真身。不以生滅而有變。故曰四大分張。十方世界現全身。長沙云。盡十方世界。是沙門全身。上言捨身發願度人。經旨一品已竟。偈曰。

捨身發願度衆生

不順人情闡正宗

有智上根明聖道

無緣迷種墮凡籠

知恩莫負傳玄意

報德休忘見性功

粉骨碎身心不退

乾坤總是佛家風

先天大道。本性就是品第十二

此經一品。主意一科。道不遠人也。祖見行人不明。卽性卽道。故立此品示之。先天大道者。道居天地之先也。雖居天地之先。不離一心之內。故云。本性就是品題解竟。偈曰。

先天大道本無形

無形就是本來人

坐臥經行彰道體

忙閑動靜露天真

聲聞偏重聲聞法

緣覺專修緣覺乘

若是如來親嫡子

刹那明道獨爲尊

涅槃經二十八卷云佛言一切衆生應有佛身如我今也。

佛身者卽佛清淨法身就是先天大道此道衆生本具故曰如我今也。

衆生佛性不破不壞不牽不捉不繫不縛無罣礙故各不自見有此虛空。

佛性卽佛身也衆生本有佛性不假衆緣而成圓滿無欠。猶若虛空牽捉繫縛莫能加之。一物也無有何罣礙衆生背覺合塵各不見此虛空。

若是衆生無虛空者則無去來行住坐臥不生不長。

衆生不見虛空虛空不曾欠少。龐居士云。卽在空裏行日沒空裏臥空坐空吟詩詩空空相和衆生若無虛空佛性行不能行坐不能坐正是行住坐臥不離這箇這箇空性人人本有若無有者去來生長行住坐臥皆不可得矣。

十住菩薩少能見之。

上言眾生本具。各不自見。非但眾生不見。十住少能見之。佛性道大。初賢機小。少分見之。不能全見也。眾生佛性。諸佛境界。一切眾生。不見佛性。常為煩惱繫縛。流轉生死。

眾生本有佛性。即是諸佛境界。非是聲聞緣覺所知。眾生煩惱繫縛。何由得見佛性。流轉生死。受苦無盡。若見佛性。諸結煩惱。所不能繫。解脫生死。得大涅槃。

眾生若見佛性。即入諸佛境界。無明頓滅。煩惱永忘。而有離苦得樂利益也。涅槃者。梵語。此云不生滅也。道德經序曰。夫道者。事物當然之理。亘古今。窮天地。如元氣之運行。四時。何曾一時暫息。道本生育天地之前。不立於有物之後也。

此序合下清淨。破邪十五解明。茲引出經前序。證上先天大道。即是事物當然之理。率性行之。便是不須向外別求。夫者。起語之端。天下一事一物。莫不各有當然之道理也。此是從古至今。自天而地。獨立不變。周行不殆。四季如常運行。一時不曾止息。用雖應於今時。體則居乎劫外。故曰。道本生育天地之前。不立於有物之後也。

清靜經曰。大道無形。生育天地。大道無情。運行日月。大

道無名。長養萬物。吾不知其名。強名曰道。

前言道德之序。此引清靜之經。直指先天大道。本無形名可得。雖無形。能生天地。雖無名。能長萬物。四時變化。日月運行。不知誰解巧安排也。後二句。爲人拈情。吾也不知其名。不得已而強名曰道也。

金剛科儀云。

佛在靈山莫遠求。

靈山只在汝心頭。

人人有箇靈山塔。

好去靈山塔下修。

此引合下四教。重頌道不遠人。深明先天大道。本性就是也。此下二偈。出序分。前二句。遠指佛在靈山。近指不離自心。後二句。廣爲指示。靈山塔者。心之異名。心卽是佛。山卽是心。學人要去靈山見佛。不可離我方寸之心。故曰。好去靈山塔下修。

西方淨土人人有。

不假修持已現前。

諸上善人如見性。

阿彌陀佛便同肩。

前二句。直指自性西方。唯心淨土。人人本有。不假修添。後二句。勉人還要用工。但肯信心。決不相賺。自性彌陀。不離左右。他卽是我。我卽是他。故曰。便同肩。

圓覺卷云。

一段無生淨土天。

娑婆迷子莫外觀。

回頭點開通天眼

觀面相逢不用參

此下三偈出圓覺前二句。直頌先天大道。本無生滅。本無垢染。人人本性就是。迷人切莫外求。後二句。直下明心。就是通天眼目。淨土天。與你觀面相逢。親見不勞外覓。故曰不用參。

原來自在一刹那

在在處處有真佛

忽然識得娘生面

觀目親觀笑呵呵

刹那明道。勝修多劫。大了之人。只在刹那。在在處處有真佛。法華云。十方諸國上。無刹不現身。後二句。若人發明本有實相。就是娘生面目。如貧得寶。衣食無

虧。似兒見娘。饑寒頓滅。今日離苦得樂。故曰笑呵呵。

○昔有婆羅門婦。生子胎盲。惟識母之音聲。不見母之形相。後母音啞。其子晝夜悲泣。佛與阿難同行。見此子盲母啞。發慈悲心。顯威神力。點開子目。阿難問曰。汝見母乎。其子愈加煩惱。唯念母啞。何時能語。佛復救清母音。母勸其子莫悲。子聞母語。互見歡喜。故曰。觀目親觀笑呵呵。此喻學人不識娘生面目。問着就如木人。此即盲啞人也。一朝親見。問無不知。盲者得明。啞者能語。笑呵呵。喜不自勝之貌。

古性彌陀歷歷明

迷人不識向外尋

有緣若遇親指點

不勞彈指見金容

前二句直頌自性彌陀。昭然明白。迷人不識。向外馳求。後二句。夙有善緣。遇師指點。不勞彈指。親見彌陀。古德云。踏破鐵鞋無處覓。得來全不費工夫。

金剛寶卷云

安在玄中古佛堂

綿綿密密去燒香

信心久遠超三界

了潔非他卽無樣

此下五偈出寶卷。燒香者。誠敬也。了潔者。明白也。此言本性彌陀。亘古安然。至今自在。愚人被欲所累。不得安然自在。智者觀法無我。時時安然自在。卽此就是玄妙處。卽此就是古佛堂。到此田地。時時保任。不得懈怠。如此信心不變。自然超出三界之生死洞明。無相之彌陀。故曰。了潔非他卽無樣。

蓮在海中捧世尊

多少迷人錯認真

這箇玄妙超佛祖

安得非心圓大乘

此頌廢權立實。不可取相求玄。蓮在海中捧世尊。無垢云。泥塑木雕。紙畫銅鑄。皆以世尊。安於蓮座之上。下做海潮之形。此是住世三寶。引迷衆生。改惡向善。多少迷人。錯認真。金剛云。若以色見我。以音聲求我。是人行邪道。不能見如來。故曰。錯認真。這箇玄妙超

佛祖無垢云。忽然自悟自見本性。超過諸佛位。便是超佛越祖之功。安得非心圓大乘。安然會得。非佛非心之妙。纔是圓教大乘之法也。

有等迷人不得知。

終朝會面不曾離。

虧了老僧親打破。

脫却塵埃獨自歸。

老僧卽月舟也。塵埃卽迷惑也。此月舟以已較人。不可捨已從人也。前二句。點迷不明心性。終朝向外馳求。不識自性彌陀。時刻不離方寸。後二句。顯已得悟還原。打破狐疑窟。雲消月滿天。

月舟和尚觀了空。

識得無爲不用功。

自己原來光燦燦。

不離方寸在玄中。

此月舟以已勉人。不可昧已逐物也。未明此道。觀空靜坐。一日觀空了義。不用工夫。永嘉云。覺卽了。不施功。一切有爲法不同。故曰。識得無爲不用功。後二句。直言此道圓陀陀。光燦燦。常在目前。不離自己。忽然契悟。妙在其中。故曰。不離方寸在玄中。

大地衆生一刹那。

識得自己活彌陀。

卽今常在三界外。

絕盡無爲沒娑婆。

我祖勉人悟道。只在一刹那間。刹那者。譬如力士斷藕絲。乃至速之頃也。刹那明了自己彌陀。卽是先天。

大道。此道盡虛空。遍法界。處世無世。居塵出塵。故曰。卽今常在三界外。絕盡無爲。沒娑婆。不住無爲之無。不執有爲之有。有無不住。空假互融。獨顯中道第一義諦也。

香山寶卷云。

良緣大衆發虔心。

高舉大悲菩薩名。

念一聲來應一聲。

本性彌陀休外尋。

此卷宋開國公蔣之奇撰。觀音現身爲莊王之女。後往香山修道。以山名卷也。前二句勉人早發虔心。高舉菩薩名號。大士慈悲廣大。願力弘深。尋聲救苦。與此土宿有良緣也。後二句卽事卽理。要知舉念處。是誰應和處。是誰這裏會得。就是本性彌陀。拈起便是。不勞外尋。

彌陀寶卷云。是心是佛。是心作佛。三世諸佛。證此心佛。此文出中峯和尚勸人念佛圖。共有一百八句。此引二十二句。結前品題。先天大道。本性就是。勉人見性成佛。莫向外求。是心就是佛。是心能作佛。三世十方佛。證此心是佛。

六道衆生。本來是佛。只因迷妄。不肯信佛。智者覺悟。見性成佛。

心佛及衆生。是三無差別。迷人不解。知智者方知。一故曰見性成佛。

心心是佛。念念是佛。無常到來。正好念佛。撒手歸家。必定見佛。

心心念念。常歸於佛。法華云。心念不空過。能滅諸有苦。無常二句。非是大限臨頭念佛。但言頭痛眼花。閻羅王接人來到。鬢斑齒損。無常鬼寄信相尋。遇此時節。老當益壯。正好念佛。且道舉念何佛名號。中峯云。念佛念心。念心念佛。叮嚀相勸。念自己佛。急急回光。休別覓佛。念念不昧。誰不是佛。撒手歸家。必定見佛。

優曇云。佛念自家佛。心明劫外心。若能明這箇。何用遠追尋。

一道圓光。卽性空佛。了此一念。是名爲佛。常住不滅。無量壽佛。

前二句。直言先天大道。不離自身。圓陀陀。光燦燦。亦非別物。卽是自性真空佛也。華嚴云。性空卽是佛。不可得思量。中二句。急處一提了者。明也。覺也。一念迷者。是衆生。一念覺者。名爲佛。後二句。發明常住真心。本無生滅。不可喚作別物。卽是無量壽佛。梵語阿彌陀。此云無量壽。不可以限量定其壽數也。上言先天

大道本性就是經旨一品已竟偈曰。

弘通祖教究心宗 權實雙彰法法同

句句單傳無一物 言言直指本來空

穿衣吃飯開方便 運水搬柴顯妙功

剎剎塵塵真受用 十方凡聖盡包籠

難字 猶狻穴旭狠亨蜃瞬軟軟療料療料啄卓馗魁

邯鄲合奘式竑和躡漱唵扎撮促撫遮鐫尖娉聘

圍淨姪任訐訐沿言瑩榮痊愈千酤沽攬覽椹辰

句容縣奉 佛信女魏如空募刻

正信除疑無修證自在經會解上終

